

# Apokalipisi

## Ongú inde u ambamba ta e

### Eli na kalanu

Djaa aye bhuku na Apokalipisi inde-e bhú nedhinga u adu ato mbolo li omakilisito lie kabula nabhuka bhú Yesu Kilisito maka Ngámá gba o. Engú na ngbéngbé inde bhú bhuku inde-e, Djaa ngapa pi okpála inde ngatatanga me u du ne nabhuka di ne masi. Djaa atsia aha líli pi uo me, u lu kpékpéke bhú 'ngú na kukulu nedhinga na likabhu di ne bhú onedhinga u ngato mbolo li uo lie-o.

Bhú bhuku inde-e, u aye bhúbhú ongú bhelé pindji nambamba ta ongú, di ne pindji nau ongú maka loto li da e nde kpékpéke ngú nambimbila. Engú na ngbéngbé bhúbhú-o mbámhá. A ko engú inde me: li pápá gba Kilisito Ngámá gba ní-e, a li soso-o, Ebhe ahá angu obhulu yala gba e hana, ani há di angu Satana . Ani há di makalá pi okpála na ngbingbili gba e, ne bisagu na abhúhá na mbia di ne doto na mbia inde ani ako angu e pí ndu 'ngú lie hana-o.

**Ongbengbe ongú inde bhú bhuku inde-e ngae inde:**

Eli na kalanu 1:1-20

Balua pi oDadjua mananika gba Ebhe 2 - 3

Malika 4:1 - 8:5

Ototi mananika 8:6 - 11:19

Nau ongú mananika maka loto 12:1 - 15:8

Okópo mananika na ke 'ngú gba Ebhe 16:1-21

Ongú mananika u apa e pindji babilona 17:1 -  
 19:10  
 Nabu ta 'ngú pindji nau ongú mananika maka  
 loto 19:11 - 21:8  
 Yelusalema na mbia, ølø gba Ndili Kandølo  
 21:9 - 22:21

### *Lita 'ngú-o*

<sup>1</sup> Bhuku inde-e ngakpokpo 'ngú pindji engú inde li Ebhe ambamba ta e pi Yesu Kilisito-o . Ebhe ambamba tata pi ani ngubula me ani suno pi obalise gba ni-o, engú inde améne lie mbia inde-o. Abhomu-o, Yesu Kilisito atsia atima andjelu gba e me ani mbamba ta engú ango-o pi bali gba ni Djaa . <sup>2</sup> Djaa akpokpo ndu 'ngú inde ani au e hana. Ndu 'ngú inde ani au e hana-a, a ko 'li Ebhe, a ko la di kukulu 'ngú inde li Yesu Kilisito ambamba ta e pi ani-o. <sup>3</sup> A ko djali pi kpála inde ngatanga bhuku inde, ne obhende i ngadje ongú inde li Ebhe ambamba ta e bhúbhú-o, inde di ngakpata ongú inde aye lie bhú bhuku inde-o. Padhá de, anga nedhinga na ongú ango-o akolo masikpe.

### *Djaa yi okpála na oDadjua mananika gba Ebhe-e mayi*

<sup>4-5</sup> Ngama Djaa, ma atima balua inde-e bhú oDadjua mananika inde bhú ndu doto na Adjia-o.

A ayo me Ebhe inde uu inde adu nani uu, inde la di ngago-o, suno bádha bhú 'bu ne guo 'ngú gba e pi yi. A ayo di me obua mananika inde kala kiti na ngámá gba Ebhe-e, bhú dabili ne Yesu Kilisito suno bádha bhú 'bu ne guo 'ngú

pi yi. Yesu Kilisito-o, a ko kpála inde akpokpo ngbili 'ngú . A ko di kpála na kalanu inde azuku bhú ká okpála inde amu, a ko la di ngámá gba ongbengbe ongámási na doto.

Kilisito ngakunda ní, ani atsia agbegbe ní bhú osisiti 'ngú gba ní-e ne ngute e. <sup>6</sup> Ani amene me ní kolo okpála na Nau gba Ebhe . Ani amene di me ní kolo odimandø ngubula namene kulu liní pi Ebhe, 'Dyi ni. A ayo me sangu di ne angu du pi ani duduma ne duduma! A adu moko.

<sup>7</sup> Yi tsitsia, ani ngago bhú ndindi!

Ndu okpála hana aú ani,  
belegu obhende adu nani kala ani ne mandambi-o.

Ndu opiga inde píla doto libhomu adú bhú 'gbá li 'ngú gba ani-o.

Heni, a adu moko!

<sup>8</sup> Ebhe Ngámá Apí 'Kpí apa me: «Ma ne Kpála inde akpo lita ndu 'ngú hana, ma di ne Kpála inde abú ta ndu 'ngú hana.» Ebhe ne Kpála inde uu, Kpála inde adu nani uu, Kpála inde di ngago.

### *Djaa au Kilisito bhú 'he maka loto*

<sup>9</sup> Ngama Djaa, ma ne ndai yi inde ngakobho bhú dabili bini ne yi bhú likabhu, ne bhú Nau ne nazi kekele bhú nabhuka Yesu. Ngama-a, ma du nako bhú kpata bhú kpøme inde u a'i e me Patemosi kabula 'li Ebhe, la di anga ma ngakpokpo kukulu 'ngú inde li Yesu ambamba ta e-o. <sup>10</sup> Bhú 'kpí gba Ngámá-a, Bu Bhobua abedhe ma, ma atsia adje ne akele ma kpéke eli bini maka mbala. <sup>11</sup> Eli ango-o apa me: «Ehe inde mu ngau e-e, ye bhú bhuku bini, amba mu tima bhú

oDadjua mananika gba Ebhe inde bhú Efeso, bhú Similine, bhú Pelegame, bhú Tiatile, bhú Salade, bhú Filadelefi ne bhú Laodisé.»

<sup>12</sup> Abhomu-o, ma adji lima ngú natsia kpála inde adu nagama 'ngú muma-o. Ma adji lima lie, ma au otala na olo mananika. <sup>13</sup> Bhú ka otala ango-o, ehe bini adu maka kpála-kuti. Aní adyi 'ndjá bongo akolo bhú 'dhu e, aní atsia agbite mbulu e ne mukabha inde u amene e li olo.† <sup>14</sup> 'Ndji aní ne sundjo aní avu má tuu, maka kato! Djila aní adu nade maka zi djua. <sup>15</sup> 'Dhu aní adu nasu maka kalase na kpéke mase inde u ato e bhú djua, zizi atsia aholo nasu. 'Li aní adu maka tolo wowo 'ngu. <sup>16</sup> Aní aholo ikupala mananika ne 'kpa e na kokpa. A adu akoto bhú 'bhø aní ne mbotia inde adhe ne ndu pasu bhisi hana. Bhúla aní adu asu maka kpéke zindjila na tulukpe.

<sup>17</sup> Ma au aní lie, ma atí bhú li 'dhu aní maka kpála inde akpi. Pipita-a, aní a'o 'kpa e na kokpa-a pí ma, aní atsia apa muma me: «Mo okpé-e de! Ma ne Kpála inde akpo lita ndu 'ngú hana, ma di ne Kpála inde abú ta ndu 'ngú hana. <sup>18</sup> Ma la di bhú mukobho. Ma adu nako me ma nde akpi, la mbia inde-e, ma bhú mukobho na duduma. Ma ne angu pí 'ndji kuo di ne pí 'ndji bili gba okpála inde amu. <sup>19</sup> Kaka-a, ye ongu inde mo ou e inde. A ko ongu inde ngakodho 'kpí, di ne ongu inde a ayo me ago pipita ko. <sup>20</sup> Pindji oikupala mananika inde mo ou e sa 'kpa ma na kokpa, di ne otala mananika na olo-o, gbo nga 'dje mu, ma mbamba kukulu tata-a pí mu.

---

† **1:13** 1:13 Tsia bhú Dan. 7:13.

Mbila me, oikupala mananika-a, a ko oandjelu na oDadjua mananika gba Ebhe, otala mananika-a, a ko oDadjua mananika gba Ebhe-o.»

## 2

### *Balua pi okpála na Dadjua na Efeso*

<sup>1</sup> Kpála inde ma au e apa matá muma me: «Ye balua pi andjelu na Dadjua na kuti na Efeso me:

«Kpála inde aholo oikupala mananika sa 'kpa e na kokpa, inde ngadholo bhú ká otala mananika na olo-o apa me: <sup>2</sup> Ma mbila okulu gba mu-o hana. Ma mbila hana me mo omene kulu kpekpeke, me mu di ne bua na kekele. Ma mbila hana me mu tí da naziba osisiti okpála de. Ma mbila hana me mo ole okpála inde ngapa me o ne obhulu titima gba ma-a me u nde la mo-o ade-e, mo atsia au me a ko obhulu eu. <sup>3</sup> Ma mbila hana me a bhú mu ne kekele, mo osia likabhu ngubula 'li ma, mu tsia ndala de.

<sup>4</sup> La-a, siti 'ngú inde ma au e li pabili gba mu-o, a ko me mo o'o ká mukunda inde mo okunda nani ma ne e a'o. <sup>5</sup> Kaka-a, bhundja nga bili inde mo oti li e-o. Dji bua mu, amba mu mene okulu maka mo odu nako namemene lie kalanu ko. I du mo-o de-e, ma ago li pabili gba mu, ma a'é tala gba mu li bili i nde li e-o, i du me mu nde dji bua mu de ko. <sup>6</sup> Engú bini, bádha 'ngú inde bhú mu-o ngae inde: mu ngayala okulu inde li oNikolaite ngasuno e, maka ngama makpe di-e, ma ngayayala lie-o.

<sup>7</sup> A ayo me kpála inde li e ne djedje-e, dje engú inde li Bu Bhobua ngapa e pi oDadjua gba Ebhe ko!

Kpála inde agbóko 'gú bhomu-o, ma ahá lí ndula na mukobho inde bhú edyi gba Ebhe-e pi ani me ani du nazuzu. Edyi ang-o bhú kuti na mundayi gba Ebhe-o.»

### *Balua pi okpála na Dadjua na Similine*

<sup>8</sup> Kpála inde ma au e apa matá muma me: «Ye balua pi andjelu na Dadjua na Similine me:

«Kpála inde akpo lita ndu 'ngú hana, inde di abú ta ndu ongú hana, Kpála inde akpi nani, engú bini atsia azuku-o apa me: <sup>9</sup> Ma mbila likabhu gba ma di ne ndibhili gba mu-o hana, engú bini, kukulu tia mangbo ngae inde ka mu-o. Ma mbila la di maka li okpála inde ngapa me o ne omaYuda me u nde ne omaYuda ade-e, ngadi mu lie hana. La ngauo-o, a ko omaYuda de, a ko okpála gba Satana ! <sup>10</sup> Mo odjé tsulu ka likabhu inde mo osía e de. Djedje nga, djabulu andi okpála bini bini bhú ká yi bhú tikpu ngú nale yi. U ató mbolo li yi ngubula ekpi ndjikpa. Mo oyála ma de, abana i yo bha me u bhele mu. Pipita-a, ma ahá ndata na 'ngbø ndua pi mu maka makalá gba mu-o. Ndata na 'ngbø ndua ang-o, a ko mukobho na duduma.

<sup>11</sup> A ayo me kpála inde li e ne djedje-e, dje engú inde li Bu Bhobua ngapa e pi oDadjua gba Ebhe ko!

Kpála inde agbóko 'gú bhomu-o, ani síá likabhu gba nakpi na bhisi-e belegu de bini.»

*Balua pi okpála na Dadjua na Pelegame*

<sup>12</sup> Kpála inde ma au e apa matá muma me: «Ye balua pi andjelu na Dadjua na Pelegame me:

«Kpála inde ka e ne mbotia inde ngadhe ne ndu pasu bhisi hana-a, apa me: <sup>13</sup> Ma mbila bili inde mu ngadu li e hana, bili ango-o, Satana ne ngamá oo ngae. Mu ngalila 'li ma. Mu ndala 'kpa li nabhuka gba mu bhú ma-a de, abana bha li nedhinga u abhelo Atipasi lie agba yi, li bili li Satana ngadu li e-o. Atipasi adu nani nakpokpo 'ngú gba ma mbámbá kala okpála.

<sup>14</sup> La-a, siti 'ngú inde ma au e li pabili gba mu-o, a ko me, a agba mu ne okpála koko inde ngadhedhe li 'ngú li Balama adu nani nasuno e pi Balaka-o. Balama adu nani nasuno pi Balaka me ani to omafalaele bhú siti 'ngú. Ani adu apite uo me u zu oenu inde u aha o pi oebhe na eu, amba u du di nakunda olisi, i du di-e obhosi ngangá. <sup>15</sup> A bhadi moko, a di bhú ká okpála gba mu-o ne obhende adhedhe li nasuno siti líli maka oNikolaite ngasusuno lie-o. <sup>16</sup> Kaka-a, dji bua mu. Padhá de, anga i du mo-o de-e, ma ngago agba mu má gala, ma tsia gú okpála ango-o ne mbotia inde ngakoto bhú 'bhø ma-o.

<sup>17</sup> A ayo me kpála inde li e ne djedje-e, dje engú inde li Bu Bhobua ngapa e pi oDadjua gba Ebhe ko!

Kpála inde agbóko 'gú bhomu-o, ma ahá mana inde awo lie mawo-o pi ani. Ma ahá la di linga pi ani. U aye pí linga ango-o 'ili na mbia

inde li kpála bini mbila ta e de, bha bini kpála inde asia linga ango-o ko!»»

*Balua pi okpála na Dadjua na Tiatile*

<sup>18</sup> Kpála inde ma au e apa matá muma me: «Ye balua pi andjelu na Dadjua na Tiatile me:

«Ndili gba Ebhe inde li Djila e ngade maka djua, li zi 'dhu e nde ngasɛ maka kalase na kpéke mase, apa me: <sup>19</sup> Ma mbila okulu gba mu-o hana. Ma mbila mukunda gba mu-o hana. Ma mbila nabhuka gba mu-o hana. Ma mbila kulu mo omemene e pi okpála di ne kekele gba mu-o hana. Ma mbila hana me kulu mu ngamene e mbia inde-e ane bhe na kalanu-o ne bhelé. <sup>20</sup> La-a, siti 'ngú inde ma au e li pabili gba mu-o, a ko me, mu ngaziba Djedjabele, eɓe inde ngapa me ni ne polofeta gba Ebhe-o. Ani ngapite obalise gba ma-a ne nasuno pi uo engú na zabhe, di ne nazɛ onu inde u aha o pi oebhe na eu-o. <sup>21</sup> Ma a'o nako nedhinga pi ani me ani dji bua e. Engú bini, ani kunda nadji bua e de me ni 'o nakunda obhosi ngangá ma'o-o de.

<sup>22</sup> Kaka-a, ma agú 'i ani pí polo na 'ngbé likabhu bhú dabili bini ne obhende ngakunda obhosi, i du di-e olisi gba okpála koko bhú dabili bini ne ani-o, i du me okpála ango-o nde dji 'ngbu o li sisiti kulu gba ani de-o. <sup>23</sup> Ma abhili okpála inde ngakpata nganda ani-o, li ndu okpála na oDadjua gba Ebhe-e hana mbila me ma ne kpála inde i ngambila mabhundja di ne gumu gba okpála hana. Ma ahá pi kpála ne kpála bhú ká yi makalá nakpata bha lele siti

'ngú inde ani amene e ko. <sup>24</sup> La ngayi okpála na Dadjua na Tiatile, inde i dhedhe li nasuno na sisiti bhomu-o de-e, inde i kpata di engú li okpála bhomu-o nga'i e me, "Engú nawo mawo gba Satana" de-e, ma ne líli koko na'o'o pí yi ade. <sup>25</sup> Engú bini, yi dhedhe bha li engú inde ka yi akólo bha bini li 'kpí inde ma agó lie ko.

<sup>26-28</sup> Kpála inde agbóko 'gú bhomu-o, inde alíla okulu gba ma nakolo ali soso-o, ma ahá pí ani angu inde ma asia e ngama makpe ka 'Dyi ma-o. Ma a'ó ani ngámá pí 'ndji opiga. Ani aú ngámá pí 'ndji uo. Ani ahólo kalase sa 'kpa e, ani tsia dú agugumu uo maka u agugumu omadakpa lie ko.† Ma ahá di ikupala inde asusu kəkpi-e pí kpála ango-o ngú nasuno me ani agboko 'gú-o agboko.

<sup>29</sup> A ayo me kpála inde li e ne djedje-e, dje engú inde li Bu Bhobua ngapa e pí oDadjua gba Ebhe ko!»

### 3

#### *Balua pí okpála na Dadjua na Salade*

<sup>1</sup> Kpála inde ma au e apa matá muma me: «Ye balua pí andjelu na Dadjua na Salade me:

«Kpála inde li obua mananika gba Ebhe, di ne oikupala mananika nde ka e apa me: Ma mbila okulu gba mu-o hana. Okpála ngapa me mu uu, engú bini, mo okpi. <sup>2</sup> Zuzuku, mene ne kpeke me mo obulu bha má pii de! Padhá de, anga ma au me kulu gba mu-o kolo nga li

† **2:26-28** 2:26-28 Tsia bhú Ets. 2:8-9.

lelele de. <sup>3</sup> Kaka-a, bhundja nasuno inde mo osia nani e-o ne lele maka mo odje nani lie-o. Dji bua mü, amba mü lila nasuno ango-o malila! Ɔ dü la me mü nde zükü de-e, ma gó maka bhülü 'zi, ma kóto li mü bhú gbilikiti, me mü nde mbila nedhinga ango-o de.

<sup>4</sup> Engú bini, a bhú ka yi okpála na Salade ne okpála bini bini inde i siti obongo gba o-o de. U adyí obongo na bububu, ngaya ne uo-o, ya tsia dhólo bhú dabili bini. Padhá de, anga u ati ne nadhükü ne ma bhú dabili bini ngao.

<sup>5</sup> A moko, kpála inde agbóko 'gú bhomu-o, adyí obubu bongo. Ma búlü 'li ani bhú bhuku na mukobho-o de. La di-e, ma azíba kala 'Dyi ma, di ne kala oandjelu gba ani-e me, a ko kpála ka ma.

<sup>6</sup> A ayo me kpála inde li e ne djedje-e, dje engú inde li Bu Bhobua ngapa e pi oDadjua gba Ebhe ko!»

### *Balua pi okpála na Dadjua na Filadelefi*

<sup>7</sup> Kpála inde ma au e apa matá muma me: «Ye balua pi andjelu na Dadjua na Filadelefi me:

«Kpála inde bubu, inde i papa eu de, inde li fungula gba Davidi nde ka e-e, inde i 'u bhoti-e, kpála bini ti da nanini de, inde i ni la di bhoti-e, kpála bini ti da na'u'u de-e, apa me:

<sup>8</sup> Ma mbila okulu gba mü-o hana. Ma mbila hana me mü kpékpéke ade. La-a, mo olila 'li ma ndjindji. Mo opa mbámbá me mü ne kpála ka ma. Kaka-a, ma a'u bhoti kala mü, bhoti ango-o, kpála bini ti da nanini de. <sup>9</sup> Tsia nga engú inde ma améne e li okpála gba Satana ,

obhulɔ eu inde ngapa me o ne omaYuda me a nde omaYuda ade-o: ma agbéle uo kala mɛ, u títɛ lipukɛ o kuto kala mɛ ngú nadhøgø mɛ, amba u mbíla me ma ngakɛnda mɛ. <sup>10</sup> Mo olila líli gba ma pɛndji naholo bua o ndjɛndji. Kaka-a, ngama di-e, ma alíla bhadi mɛ moko li nedhinga na kpéke da 'ngú inde agó píla doto libhomu ngú nale okpála na doto kò. <sup>11</sup> Ma agó mbia! Dhedhe li nasuno inde mo odje e ndjɛndji, ngubula me kpála bini adhépe ndata na 'ngbø ndua gba mɛ-o de.

<sup>12</sup> Kpála inde agbóko 'gú bhomɛ-o, ma a'ó ani maka nepanda bhú 'ngbé 'ti Ebhe gba Ebhe gba ma-o. Ehe bini ti da nagbe matá ani oo belegu de bini. Ma ayé 'li Ebhe gba ma-a li kute ani, bhú dabilí bini ne 'li gɔdhɛ gba Ebhe gba ma-o. Gɔdhɛ ango-o, a ko Yelusalema na mbia inde ayíe abhúlá, inde li Ebhe atíma galikpe e-o. La di-e, ma ayé 'ili gba ma na mbia li kute ani.

<sup>13</sup> A ayo me kpála inde li e ne djedje-e, dje engú inde li Bu Bhobua ngapa e pi oDadjua gba Ebhe ko!»

### *Balɛa pi okpála na Dadjua na Laodisé*

<sup>14</sup> Kpála inde ma au e bhomɛ-o atsia apa mɛma li soso me: «Ye balɛa pi andjelu na Dadjua na Laodisé-e me:

«Kpála inde 'li e me “A dɛ moko”, kɛkɛlɛ kpála inde ngakpokpo 'ngú me ani nde 'o koko pépé de-e, inde lita ndɛ 'he li Ebhe abho e hana-a apa me: <sup>15</sup> Ma mbíla okulu gba mɛ-o hana. Mɛ kpikpina ade, mɛ di kpákpá ade. A

ayo igini me mu de adu kpikpina, i du mo-o de-e, mu du kpákpá. <sup>16</sup> I nde lie me mu nde yapayapa-a, mu nde kpikpina adi-e, mu la di kpákpá adi-e, ma azie mu mazie!

<sup>17</sup> Mu ngapa me: “Ma ne bhulu tia, ma asia tia bhelé, ma ne gumu 'he belegu ade bini.” Engu la bini, mu mbila de me ni bhú likabhu-o de. Mu mbila de me ni nga'o li ma ndjinga-a de. Mu mbila de me ni ne bhulu ndibhili-e de. Mu mbila de me ni u 'kpí de-e de. Mu mbila la di de me ni ndumbu-o de. <sup>18</sup> Kaka-a, ma ngayo ka mu me, a ayo nakala olo inde li djua aleke e ndjindji-e ka ma, ngabula me mu kolo bhulu tia. Ma ngayo ka mu me, a ayo nakala di obongo na bububu ka ma ngu nadyidi li kute mu, amba numu améne mu ka ndumbu gba mu-o de. Ma ngayo ka mu me, a ayo nakala la di elá ngu nasese bhú djila mu, amba mu du au 'kpí ndjindji.

<sup>19</sup> La pi ma-a, ndu okpála inde ma akukunda o hana, ma ngambe bhú 'ndji uo, ma di ngasuno oehe inde u mene e ndjindji de-e pi uo. Kaka-a, a ayo me mu dji bua mu, amba mu du kpákpá. <sup>20</sup> Djedje nga, ma alu li 'bhe bhoti-o, ma ngabhibhi. Li kpála dje 'li ma, ani 'u 'bhe bhoti-e, ma lí agba ani, li ngaya ne ani-e, ya tsia zú 'he ne ani bhú dabili bini.

<sup>21</sup> Kpála inde agboko 'gu bhomu-o, ma aziba pi ani nadu bhú dabili bini ne ma pí kiti na ngámá gba ma maka ngama di ma agboko 'gu lie, ma atsia adu bhú dabili bini ne 'Dyi ma pí kiti gba e na ngámá ko.

22 A ayo me kpála inde li e ne djedje-e, dje engú inde li Bu Bhobua ngapa e pi oDadjua gba Ebhe ko!»»

## 4

### *Abhúlá-a, ndu okpála hana ngadhөгө Ebhe*

1 Pipita-a, ma au engú koko bhú 'he maka loto. Ma au bhoti inde adu baba abhúlá.

Eli ma adje igini e kalanu mugito me u nga'u toti-e, apa muma me: «'E ei, amba ma suno engú inde ngago sidi-e pi mu.»

2 Kolo me-e, Bu Bhobua abedhe ma. Abhúlá oo, kiti bini na ngámá adu oo, kpála bini atsia adu pépé. 3 Zi kpála ango-o adu nasu maka oteme\* na zizi. Makilima asa denго kiti na ngámá inde ani adu pí e ne zi e ngbalina. Zizi adu di maka zi teme na zizi. 4 Okiti na ngámá ndjikpa bhisi ne ká badha asa denго kiti na ngámá ango-o ngbalina. Obhelesi okpála ndjikpa bhisi ne ká badha atsia adulu pépé. U adyidyi obubu bongo , u atsia adyidyi ondata na ngámá inde u amene e li olo-o bhú 'ndji o. 5 Li bili li kiti ango-o adu lie, ekpi adu andjendjengene, mugbálá adu asusula. O'i 'ke mananika inde adu atsi matsi adu kala kiti ango-o. O'i 'ke ango-o, a ko obua mananika gba Ebhe-o. 6 Kala kiti ango-o, ma au 'he bini maka 'ngbé 'ngu inde li píla e adu nasu má ngingingi maka bitolobi. A adu má ngilili maka teme† na zizi.

\* 4:3 4:3 Oteme: Bhú eli na giliki-e, u aye limbi oteme bata: djasepe, saladuane ne emelode. † 4:6 4:6 Teme: Bhú eli na giliki-e, u aye me «Teme na kilisitale.»

Lingo kiti na ngámá angó-o, okpála badha na ngangamba‡ adu oo. (A akunda napa me sunda kiti na ngámá di ne bili li obhelesi okpála ndjikpa bhisi ne ká badha adu lie-o.) Djidjila abedhe li bhúla uo di ne li 'ngbu uo bedhe. <sup>7</sup> Kpála bhe na bini-e, adu maka kingbi. Bhende na bhisi-e, adu maka folo bagala na bhobhoko. Bhende na bata-a, bhúla ani adu maka kpála-kuti. Bhende na badha-a atsia adu maka ndua inde bhú holo. <sup>8</sup> Ndu uo badha hana, u adu ne mbumbudha madhia madhia. Djidjila atsia abedhe tété bedhe bedhe, ali ngbungbu di ne asabusabu. U ngali 'tsi sukpe ne ngbikpi mandi nago me:

«Ebhe Ngámá Apí 'Kpí, Bubu, ani Bubu, ani Bubu.

A ko Kpála inde adu nani uu, inde uu, inde di ngago!»

<sup>9</sup> Ndu nedhinga hana li okpála badha bhomu-o ngali 'tsi ngu nadhogo kpála inde adu pi kiti na ngámá, kpála inde la di bhú mukobho duduma ne duduma, u ngaha sangu di ne nagie heni pi e lie, <sup>10</sup> obhelesi okpála ndjikpa bhisi ne ká badha-a ngatutu lipuku o kuto kala kpála angó-o. U ngadhogo kpála inde bhú mukobho duduma ne duduma-o. U ngapandja ndata na ngámá gba o-o, u ngabubu kala kiti na ngámá-a ne napa me:

<sup>11</sup> «Ebhe Ngámá gba ya, mo oti ne napa me okpála toko mu, u dhogo mu, amba mu sia sangu kabula ngámá gba mu-o. Padhá de, anga mo obho ndu 'he hana ngamu.

---

‡ 4:6 4:6 Okpála badha na ngangamba: Li bili inde-e, u mbila de me ne me a ko okpála-kuti, ne me a ko oandjelu-o de.

A atsia amene lie,  
 anga mo okunda nani me a amene lie moko.»

## 5

*Ndili Kandøle-o abhulu 'kpá balua inde agagala lie magagala-o*

<sup>1</sup> Pipita-a, ma au 'kpá balua bini sakpa kpála inde adu pí kiti na ngámá-o, ani aholo li pá 'kpa e na kokpa. U aye 'he pépé ne ndu pasu bhisi hana. U agagala, u atsia ayele ne malika li obili mananika. <sup>2</sup> Abhomu-o, ma au andjelu bini na angu inde adu asusula me: «A ti da nasosoko malika li kute 'kpá balua inde-e ngú nabhubhulu-o da?» <sup>3</sup> Engú bini, kpála bini inde ati da nabhubhulu di ne natsia 'kpí bhúbhú-o du de, abana abhúlá, abana píla doto, abana asa doto. <sup>4</sup> Kaka-a, ma aku 'gbá naali, anga kpála inde ati da nabhubhulu di ne natsia 'kpí bhúbhú-o du de. <sup>5</sup> Engú bini, saka obhelesi okpála apa muma me: «Mo okú 'gbá de. Tsitsia nga, kingbi na piga gba Yuda, ndili gba 'ngbé ngámá Davidi-e agboko egú-o agboko. Ani ti da nasosoko malika mananika bhomu-o, ani tsia bhulu di 'kpá balua anga-o.»

<sup>6</sup> Abhomu-o, ma au Ndili Kandøle bini alu tutu, li bili na kiti na ngámá-o. Okpála badha na ngangamba bhú dabili bini ne obhelesi okpála-a asa ani ngbalina. Ani adu mugito me u akodho ngulu ani makodho. A adu bhú 'ndji ani ne odidi mananika di ne djidjila mananika. Odjidjila mananika bhomu-o, a ko obua mananika gba Ebhe li ani atima o píla doto libhому-o.

<sup>7</sup> Ndili Kandøle-o ago, ani atsia aha 'kpá balua sakpa kpála inde adu pí kiti na ngámá-o. 'Kpá balua ang-o adu sakpa ani li pápá na kokpa.

<sup>8</sup> Nedhinga ani aha 'kpá balua lie, okpála badha na ngangamba di ne obhelesi okpála ndjikpa bhisi ne ká badha-a, atuko ne lipuku o kuto kala Ndili Kandøle-o. A adu sakpa ndu uo bini ne bini hana ne dumu di ne kópo na olo inde abedhe ne bandele bedhe. Bandele ang-o, a ko mayo gba okpála gba Ebhe-o. <sup>9</sup> U adu nali etsi na mbia me:

«Mu ti da naha 'kpá balua-o  
ne nasosoko malika ang-o,  
anga u abhøle nani mu,  
mo otsia agbegbe okpála inde adu bhú bali-e  
ne ngute mu pi Ebhe.

A ko okpála na ndu bili hana,  
ne ndu opiga hana,  
ne ndu okongú hana.

<sup>10</sup> Mo otsia amene me  
u kolo pi Ebhe gba ní-e okpála na kuti-ngámá  
gba ani,  
u kolo di odimandø pi ani,  
u tsia u píla doto.»

<sup>11</sup> Pipita-a, ma au, ma atsia adje 'li bhiti oandjelu. U adu nani okøtø ne køtø. U alulu dengo kiti na ngámá-o, ne dengo okulu 'he badha-o, di ne dengo obhelesi okpála-o. <sup>12</sup> U adu asusula kpekpeke me:

«Ndili Kandøle nani inde u abhøle e  
ati ne nasia sangu ,  
ani ati ne nasia tia, ne imbilangu, di ne ngámá.  
A ayo me okpála toko ani,

u manga aní.

A ko kpála na angu.»

13 Ma atsia adje di ndu ohe na píla doto libhomu ne ohe na abhúlá ne obhe na sa doto, ne obhe na abhú 'ngu-o hana aholo nali etsi me:

«A ayo me duduuma ne duduuma ní toko,  
ní dhөгө, amba ní ha di sangu ne ngámá pí  
kpála inde

ngadu pí kiti na ngámá-a

bhú dabili bini ne Ndili Kandөлө-o.»

14 Okpála badha na ngangamba-a adu abhuka engú u adu apa e bhomu-o me: «A adu moko!» Obhelesi okpála atsia adu atutu lipuku-o kuto kala kiti na ngámá ne nadhөгө Ebhe bhú dabili bini ne Ndili Kandөлө-o.

## 6

*Ndili Kandөлө-o aholo nasosoko omalika mananika li kute 'kpá balua-o*

1 Abhomu-o, ma atsia 'kpí, ma au Ndili Kandөлө-o asoko suka omalika mananika li 'kpá balua-o. Aní asoko lie, ma adje suka okpála badha na ngangamba-a ngagama 'ngú kpékpéke mugito me mugbálá ngasusula ngae. Aní me: «Gogo!» 2 Ma me ma tsia 'kpí me-e, ma au punda bini na bubu akoto. A adu sakpa kpála inde adu pí ani-e ne adili. U ato ndata na ngámá bhú 'ndji aní. Aní anu maka kpála inde agboko 'gú ngú nagboko matá egú koko.

3 Nedhinga aní asoko malika na bhisi-e lie, ma adje kulu 'he na bhisi-e apa me: «Gogo!»

4 Abhomu-o, li punda koko akoto lie-e, kute aní

ambe maka djua. U aha pi kpála inde adu pí ani-e angu na'e guo 'ngú p'la doto ngubula me okpála bhili lio. U atsia aha di pi ani mbotia na ndjándjá.

<sup>5</sup> Li Ndili Kandelø-o asoko malika na bata lie, ma adje kulu 'he na bata-a apa me: «Gogo!» Ma me ma tsia 'kpí me-e, ma au punda na bibili. A adu sakpa kpála inde adu pí ani-e ne kilo. <sup>6</sup> Ma adje 'he mugito me kpála agama 'ngú bhú ká okpála badha na ngangamba-a me: «Li kpála mene kulu ekpí bini libhomu-o, ani de sia tia inde i ti da nakala bha bini koli kilo na ngano bini, i du mo-o de-e, ani de sia tia inde i ti da nakala bha bini koli kilo na olodje bata.\* Engú bini, vino ne emu-o adúla lie de.»

<sup>7</sup> Li Ndili Kandelø-o asoko malika na badha-a lie, ma adje kulu 'he na badha-a apa me: «Gogo!» <sup>8</sup> Ma me ma tsia 'kpí me-e, ma au punda na 'ngu kpadhi. A adu 'li kpála inde adu pí ani-e me «kuo.» Bili gba okpála inde amu-o adu li 'ngbu ani. U aha nani angu pi uo ngubula nabhili té okpála na p'la doto. I du me okpála nde badha-a, u bhélø kpála bini bhú ká uo. U abhili té okpála bhomu-o ne egú, ne gumu, ne okuo di ne onute.

<sup>9</sup> Li Ndili Kandelø-o asoko malika na bhuluvue lie, ma au bua okpála inde u abhili nani o sa misa natsulu enu pi Ebhe-o. U abhili nani okpála bhomu-o ka anga u abhuka 'li Ebhe, u atsia akpokpo di mbámhá. <sup>10</sup> U adu asusula kpekpeke me: «Ngámá na bubu, mu ne kukulu ngámá

\* **6:6** 6:6 Bili inde si-e akunda napa me adyindi adu naali. Mase ezu akpéke na kuo kuo.

ngamụ. Mụ ngadjeke ni ngú nakodho 'ngú sunda ya ne okpála na doto-o? Ngauo, u abhili nani ya. Kodho 'ngú bhomụ-o kokodho, amba mụ 'o 'ngú pí uo.» <sup>11</sup> Abhomụ-o, u aha pí ndụ uo hana bini ne bini lobe na bubu. U atsia apa pí uo me: «Yi djeke nga mbo bedi, alo gba yi-e le nga de. A ne ondaise yi koko inde ngakpata nganda Ebhe. A ayo me okpála na doto bhili nga di uo maka u abhili nani yi lie ko. Pipita-a, u tsia kódho 'ngú gba yi ne uo bhú dabili bini.»

<sup>12</sup> Pipita-a, ma au Ndili Kandөлө-o asoko malika na madhia-o. Abhomụ-o adjigidjo na ngbéngbé amene lie. Ela abili bhúla e má mbilili maka bongo na pili. Epe libhomu atsia andju má ngua maka ngute. <sup>13</sup> Oikúpala ayie abhúlá, abala kuto maka lí 'lá bhe i mbe de-e ababala lie ka kpéke anvi-o. <sup>14</sup> Kokpí angita maka 'kpá balua inde u agagala e magagala. Ndụ oeta hana ne okpəmө hana ayie bhú dá o. <sup>15</sup> Ongbengbe ongámási na doto, ne ongbengbe okpála, ne ongbengbe ongámási na sudha, ne obhulú tia, ne okpála na angu di ne ndụ okpála koko hana, obalise ne okpála inde bhú bali ade, ndụ uo hana awowo lio bhú ogudho teme ne bhú oeta. <sup>16</sup> U aholo apa pí oeta di ne pí ongbengbe teme me: «Yi bala pí ya, amba yi wo ya tsutsu. Yi wo ya me kpála inde adu pí kiti na ngámá-a aú ya de. Yi wo ya ka kpéke ke 'ngú gba Ndili Kandөлө-o. <sup>17</sup> Padhá de, anga 'ngbé 'kpí na ke 'ngú gba uo akolo. A ti da nalụ kakala da?»

*Okpála kutu kámá bini ne ndjikpa badha ne ká badha*

<sup>1</sup> Pipita-a, ma au oandjelu badha, u nde alulú li odje doto badha hana. U adu ayoko me anvi bini apé pí doto, i du di-e pí 'ngbé 'ngu ne pí ondula de. <sup>2</sup> Abhomu-o, ma au andjelu koko bini ayie ne andjongu. A adu sakpa ani ne kasé gba Ebhe na u-o. Ani asula ne angu hana pi oandjelu badha inde li Ebhe aha nani angu nabhili doto pi o bhú dabili bini ne angu nasiti 'ngbé 'ngu-o pi o me: <sup>3</sup> «Yi abhíli nga doto ne ondula padhá de. Yi asíti nga di 'ngbé 'ngu padhá de. Yi djeke nga me ya tu kasé pidi obalise gba Ebhe gba ní-e paká.»

<sup>4</sup> Ma atsia adje alo gba okpála inde u atu kasé lio-o. A adu okpála kutu kámá bini ne ndjikpa badha ne ká badha bhú ndu opiga gba omafsalaele hana. <sup>5</sup> Bhú piga gba Yuda, okpála bhe u atu kasé lio-o adu okpála kutu ndjikpa ne ká bhisi. Bhú piga gba Lubeni-e, okpála adu kutu ndjikpa ne ká bhisi. Bhú piga gba Gada-a, okpála adu kutu ndjikpa ne ká bhisi. <sup>6</sup> Bhú piga gba Asela-a, okpála adu kutu ndjikpa ne ká bhisi. Bhú piga gba Nefitali-e, okpála adu kutu ndjikpa ne ká bhisi. Bhú piga gba Manase-e, okpála adu kutu ndjikpa ne ká bhisi. <sup>7</sup> Bhú piga gba Simeona-a, okpála adu kutu ndjikpa ne ká bhisi. Bhú piga gba Levi-e, okpála adu kutu ndjikpa ne ká bhisi. Bhú piga gba Isakala-a, okpála adu kutu ndjikpa ne ká bhisi. <sup>8</sup> Bhú piga gba Djabulona-a, okpála adu kutu ndjikpa ne ká bhisi. Bhú piga gba Djodjefu-o , okpála adu kutu ndjikpa ne ká bhisi. Bhú piga gba Bendjame-e,

okpála adu kutu ndjikpa ne ká bhisi. U atu kasé li ndu okpála bhomu-o hana.

*Libi okpála inde li Ebhe alo o-o*

<sup>9</sup> Pipita-a, ma atsia matá 'kpí, ma au bhiti okpála na bhibhiti inde li kpála bini ti da nako alo gba o-o de. A du okpála na ndu bili hana, ne ndu opiga hana, ne ndu okongú hana. U alulu kala kiti na ngámá di ne kala Ndili Kandølo-o . U adyidyí olobe na bububu, adu sakpa uo ne okpá ngulu. <sup>10</sup> U adu asusula ne angu o hana me:

«Mukobho ngayie ka Ebhe gba ní  
inde adu pí kiti na ngámá-o,

di ne ka Ndili Kandølo-o!»

<sup>11</sup> Ndu oandjelu hana alulu dengo kiti na ngámá-o, ne dengo obhelesi okpála di ne dengo okpála badha na ngangamba-o. U atutu bhúla o ne kuto kala kiti na ngámá-o, u atsia adhøø Ebhe. <sup>12</sup> U adu apa me:

«A adu moko!

A ayo me okpála toko Ebhe gba ní-o.

A ko Ebhe na sangu,

a bhú ani ne imbilangu.

A ayo me okpála gie heni pí ani, u manga ani.

A ko Ebhe na angu.

Ani kpekpeke, duduma ne duduma!

A adu moko!»

<sup>13</sup> Suka obhelesi okpála bhomu-o ayi ma me: «Okpála inde adyi obubu lobe-e, a ko oda? U ayie la di su?» <sup>14</sup> Ma agie pí ani me: «Bhele kpála-a, ma mbila hana.» Ani atsia apa mama me: «A ko

okpála inde apu bhú 'ngbé likabhu na ngbéngbé-o. U avulu olobe gba o-o, u atsia aleke ne ngute Ndili Kandele-o ngubula me akolo bubu.

<sup>15</sup> Ka 'ngú ang-o, u alulu kala kiti na ngámá gba Ebhe-o.

U ngamene kulu lio pi ani sukpe ne ngbikpi hana bhú 'ngbé 'ti gba ani-o.

Kpála inde adu pi kiti na ngámá-a adú bhú dabili bini ne uo ngú nalila uo.

<sup>16</sup> U djé matá gumu belegu de bini, u djé di matá gumu 'ngu belegu de bini.

Ela, i du di-e mangua kpá bili dho-ie tsulu matá uo de.

<sup>17</sup> Padhá de, anga Ndili Kandele inde alu kala kiti na ngámá-a adú maka mulila gba uo ngae.

Ani ató bhula uo li bili li okpongu na mukobho nde lie-o.

Ebhe tsia kúo ngula sala uo hana.»

## 8

### *Ndili Kandele-o asoko malika na mananika-o*

<sup>1</sup> Nedhinga li Ndili Kandele-o asoko malika na mananika-a lie, sukpe andjili abhulá má bulu, masakpe de miniti ndjikpa bata. <sup>2</sup> Pipita-a, ma au oandjelu mananika inde alulu kala Ebhe-o. U aha ototi pi uo mananika.

<sup>3</sup> Andjelu koko bini ago alu dengo misa natsulu mangotsi pi Ebhe-o. A adu sakpa ani ne saani na olo ngú natsulu bandele. U aha bandele pi ani bhelé ngú napa me ani tsulu pi Ebhe bhú dabili bini ne omayo gba okpála gba Ebhe-o. Ani

tsulu pí misa inde u abho e li olo-o. Misa angoo adu kala kiti na ngámá-o. <sup>4</sup> Ngúwa bandele li andjelu-o adu atsulu e-e, a'e'e lie abhúlá bhú dabilí bini ne omayo gba okpála gba Ebhe, anu a'u kala Ebhe. <sup>5</sup> Pipita-a, andjelu-o aha saani natsulu bandele-o. Ani abedhe ne djua inde adu oo-o, ani atsia abhike píla doto. Ekpí andjengene, mugbálá asula, adjigidjo adhika.

*Ototi badha na kalanu-o asula*

<sup>6</sup> Abhomu-o, oandjelu mananika inde aholo ototi mananika-a aleke lio ngú na'u'u.

<sup>7</sup> Andjelu na bini-e a'u toti gba e-o. Itimeli, ne djua bhú dabilí bini ne ngute abala píla doto. A tsia atsulu té doto di ne ondula. I du me u nde agbo bhusu doto di ne ondula hana bata-a, akunda napa me bini bhú káká atsulu bhomu-o ngae.

<sup>8</sup> Pipita-a, andjelu na bhisi-e a'u toti gba e-o. Ehe bini maka 'ngbé 'ta djua ati bhú 'ngbé 'ngu. Engu agbo bhusu e bata, bhe bini-e atsia adji lie ngute. <sup>9</sup> Té ndu 'he li Ebhe abho e hana inde ngadu abhú 'ngbé 'ngu, bhú dabilí bini ne ozabu-o atsia amu. U po bhúla ndu 'he inde li Ebhe abho e bhú 'ngbé 'ngu, u po di bhúla ozabu hana-a, u tsia gbo bhusu bhusu bata-a akunda napa me akpi bhomu-o ne bini bhú káká.

<sup>10</sup> Abhomu-o, andjelu bhe na bata a'u toti gba e-o. 'Ngbé ikupala bini inde li zi e adu atsi maka zi 'ké na ngbéngbé ayie abhúlá, ati kuto. A atsia ati pí té ongade 'ngu di ne okpongu-o. I du me u nde apo bhúla ongade 'ngu di ne ondjingu hana-a, u tsia gbo bhusu bhusu bata-a, akunda napa

me ati bhomu-o pí bini bhú káká. <sup>11</sup> A adu 'li ikupala ango-o me «Ehe na susu.» Abhomu-o, té oengu-o akolo susu. Bhelé na okpála inde andji-e atsia amu, anga akolo susu.

<sup>12</sup> Pipita-a, andjelu na badha-a a'u toti gba e-o. A asu té ela ne té epe di ne té oikupala. I du me u nde agbo bhusu ela ne epe di ne oikupala ne ndundundu bata-a, akunda napa me a asu bhomu-o bini bhú ká ndundu hana. A atsia abili bhúla uo hana li pápá bini bini. Zi ngbikpi du matá nasu libhomu de, abana di zi epe. I du me u nde agbo bhusu zi ngbikpi ne ndundundu bata, u gbo di bhusu zi epe ne ndundundu bata-a, akunda napa me bini bhú ká ndu uo bini bini hana du matá nasu de.

<sup>13</sup> Pipita-a, ma atsia matá 'kpí, ma adje ndua bini me ani nde ngakodho 'kpí abhúla tsutsu naali. Ani adu nasusula me: «A ko likabhu! A ko likabhu! A ko likabhu pi okpála na doto li oandjelu bata bhe koko a'ú toti gba o-o lie ko.»

## 9

### *Andjelu na bhuluvue a'u toti gba e-o*

<sup>1</sup> Abhomu-o, andjelu na bhuluvue a'u toti gba e-o. Ma au ikupala bini ayie abhúla, ati píla doto. U atsia aha lifungula na 'bhø tsu 'dú-o\* pi ikupala ango-o. <sup>2</sup> Ikupala bhomu-o abhulu bhøbhø. Ngúwa bini akoto bhúbhú maka ngúwa na ndingidhi djua. Bhúla ela ne bhúla 'kpí atsia abili ka ngúwa ango-o má pi! <sup>3</sup> Omakilingbo aze bhú ngúwa bhomu, u atsia ayangba píla doto. U

\* **9:1** 9:1 Tsu 'dú: A ko bili inde li osisiti bua ngadu li e.

aha nani pi uo sili maka bhende gba oapekebhe. <sup>4</sup> U aha lili pi uo me u améne ulu sisiti de, u améne ondula sisiti de, u améne di ohe inde ngakø bhú doto sisiti de. Engú bini, u mene mangbo sisiti bha bini okpála bhende li kasé gba Ebhe-e nde pidi o ade-o. <sup>5</sup> U ha kpadji pi uo ngú nabhili okpála bhomɔ-o de, engú bini, u to mbolo li uo ngú epe bhuluvue. Mbolo ango-o adú ami li uo maka ngabhø apekebhe amimi lie me a nde adho kpála-o. <sup>6</sup> Bhú epe bhuluvue bhomɔ-o, okpála agíli kuo, engú bini, u úu de. U adú ne gumɔ namu, engú bini, kuo akpé de uo tsutsu.

<sup>7</sup> Omakilingbo bhomɔ-o adɔ maka opunda inde bedhe ngú egú. A adɔ pí 'ndji uo ne ehe maka ndata na ngámá inde u abho e li olo. Bhúla uo adɔ maka bhúla okpála-kuti. <sup>8</sup> Sundjo adɔ bhú 'ndji uo ndjandjandja maka sundjo olisi. 'Te uo adɔ maka ote okingbi. <sup>9</sup> Mbulu uo adɔ mɔgito me u adyi tété bongo na kalase. Gili mbudha uo adɔ aɔ mɔgito me a ko gili bhiti opunda inde adji bhú 'gú. <sup>10</sup> A adɔ li uo ne soso maka 'so apekebhe, atsia adɔ bhúbhú ne sili inde u adɔ ato mbolo li okpála ne e ngɔbula epe bhuluvue-o. <sup>11</sup> Ngámá gba uo adɔ ne andjelu na tsu 'dú. A adɔ 'li ani bhú eli gba omaYuda me: «Abadona.» Bhú eli gba oGiliki-e, a adɔ 'li ani me: «Apoliona.» A akunda napa me bhulu nabhøø kuti.

<sup>12</sup> Likabhu na bini-e akodho 'kpí akodho. 'E-e! Likabhu koko bhisi matá ngago pipita.

*Andjelu na madhia a'u toti gba e-o*

13 Pipita-a, andjelu na madhia a'u toti gba e-o. Ma adje eli ayie ne li odje misa natsulu bandele pi Ebhe-e badha hana. Misa ang-o adu kala Ebhe, u amene li olo. 14 Eli ma adje e apa pi andjelu na madhia inde adu ne toti sakpa e me: «Bhulu oandjelu badha inde u agbigbite o ne ekpi denge ngade 'ngu na Efalate-o.» 15 U atsia abhulu oandjelu badha-o. Li nedhinga bhomu-o, bhú ekpi bhomu, bhú epe bhomu di ne kalanga bhomu-o, oandjelu bhomu-o adu nani bedhe ngu nabhili té okpála na doto. A akunda napa me, i bhaka okpála bata-a, u bhéle bini bhú ká uo.

16 U atsia apa di alo na osudha inde adu agu 'gú me u nde ne punda-a mu. A adu osudha koto ne koto. 17 Lele li opunda di ne osudha inde adu pi uo akoto li ma lie bhú 'he maka lot-o adu me: u adyidi ombulu bongo na kalase me a nde andjundju maka djua, bibili maka kokpi, a adu di ndjendje maka 'kpa bhugu. 'Ndi opunda ang-o adu maka ondi kingbi. Adu naze bhú 'bhe uo ne djua, ne nguwa di ne baluti. 18 Té okpála na doto atsia amu ka olikabhu bata inde adu aze bhú 'bhe opunda bhomu-o. A akunda napa me okpála adu amu ka djua, ne nguwa di ne baluti. I bhaka okpála bata-a, akunda napa me a bhéle kpála bini bhú ká uo. 19 Padhá de, anga angu opunda bhomu-o bhú 'bhe o di ne bhú 'so o, anga 'so uo mana kpulu. A tété ne 'ndji 'ndji inde u ngamene okpála ne e sisiti-o.

20 Dú okpála bhe atigala-a, inde i mu ka olikabhu bata bhomu-o de-e, u dji bua o li nadhoge oehe inde u amene e ne 'kpa o-o de.

U 'o nadhøgø osisiti bua de, ne okulu 'he na olo ne aladja di ne bhe na kalase na kpéke mase, ne obhe na teme, i dɔ di-e obhe na ndula-a de. Okulu 'he angoo u 'kpí de, u dje 'kpí de, u dhuku di-i de. <sup>21</sup> Okpála angoo dji bua o li nabhili okpála de. U dji di bua o li kobha gba o-o de. U dji di bua o li namene zabhe gba o-o de. U dji di bua o li ezi gba o-o de.

## 10

*Andjelu inde adɔ sakpa e ne mboye 'kpá balua-*  
o

<sup>1</sup> Pipita-a, ma au andjelu koko bini na angu ayie abhúlá. Bongo gba ani-e adɔ maka ndindi, atsia abuku ani má bhelele! Makilima aga 'ndji ani ngbalina, bhúla ani adɔ maka ela. 'Dhɔ ani adɔ maka dingidhi djua. <sup>2</sup> A adɔ sakpa ani ne mboye 'kpá balua inde u abhulu e mabhulu. Ani a'o 'dhɔ e na kokpa-a pí 'ngbé 'ngu, ani atsia a'o bhe na gali-e pí doto. <sup>3</sup> Ani asula kpekpeke maka kingbi inde ngangulumba. Ani asula lie, mɔgbálá mananika atsia asula. <sup>4</sup> Ma di me ye engú inde li omɔgbálá mananika bhomɔ-o apa e bhú nasula ka o-o. Engú bini, ma adje eli bini ayie abhúlá, atsia apa mɔma me: «Wo engú inde li omɔgbálá mananika bhomɔ-o apa e mawo. Mo oyé-e de.»

<sup>5</sup> Abhomɔ-o, andjelu inde ma de au e me ani nde a'o 'dhɔ e bini pí 'ngbé 'ngu, koko pí doto-o a'e 'kpa e na kokpa-a ne bhúlá. <sup>6</sup> Ani atsia atɔ silika ne 'li Ebhe inde bhú mukobho dɔdɔma ne dɔdɔma-o, Ebhe inde abho kokpí di ne ndɔ 'he

hana inde bhúbhú-o, abho doto di ne ndu 'he hana inde bhúbhú-o, inde abho 'ngbé 'ngu di ne ndu 'he hana inde bhúbhú-o. Andjelu angoo apa me: «Nedhinga matá-a ade! <sup>7</sup> Engú bini, nedhinga li andjelu na mananika-a ahólo na'u toti gba e lie, abhomu-o Ebhe tsia méne engú inde ani awo nani e ko. Ani améne maka ani apa nani pi obalise gba e opolofeta lie ko.»

<sup>8</sup> Abhomu-o eli ma de adje igini e ayie abhulá-a apa matá muma me: «Nu ha mboye 'kpá balua inde abhulu lie mabhulu-o sakpa andjelu alu me ani nde a'o 'dhu e bini pí 'ngbé 'ngu, ne koko pí doto ko.» <sup>9</sup> Ma atuto lima de andjelu-o. Ma atsia ayo ka ani me ani ha mboye 'kpá balua-a muma. Ani agie muma me: «Haha, amba mu zu. A adú bhú 'bhø mu kpikpili maka 'mu eú, la mo obhi lie, a adú bhú 'ndja mu susu.» <sup>10</sup> Ma aha mboye 'kpá balua sakpa andjelu-o, ma atsia azu. A adú bhú 'bhø ma kpikpili maka 'mu eú. Engú bini, ma azu lie, a adú bhú 'ndja ma susu. <sup>11</sup> Abhomu-o, u atsia apa muma me: «A ayo matá me mu kpokpo 'ngú li Ebhe apa me ni améne e pi bhiti okpála na ndu bili hana-o, engú ani apa me ni améne e pi bhiti okongú, di ne pi bhiti ongbengbe ongámási-o.»

## 11

### *Ebhe atima opolofeta bhisi*

<sup>1</sup> Pipita-a, u aha mbamba muma bini. A adu maka ndula u apipima 'he ne e-o. U atsia apa muma me: «Nu pima 'ngbé 'ti Ebhe di ne misa natsulu enu pi Ebhe-o. Mu tsia ko di alo gba

okpála inde ngadhøø Ebhe bhú 'ngbé 'ti gba aní-o. <sup>2</sup> Engú bini, 'o mbadhasu na 'ngbé 'ti Ebhe-e li ngongo. Mo opíma de, anga Ebhe apu nani bhobhomu-o pi okpála inde ne omaYuda ade-o. U adédele gudhu na bubu gba Ebhe-e ngubula epe ndjikpa badha ne ká bhisi. <sup>3</sup> Ma atíma obhulu nakpo 'ngú gba ma bhisi-e me u nde adyi bongo na talia. Ma atíma uo ngú nakpokpo engú gba Ebhe. U akpókpo 'ngú ang-o ngubula ekpí ketø bini, kámá bhisi ne ndjikpa madhia.»

<sup>4</sup> Obhulu nakpokpo 'ngú bhisi bhomu-o, a ko ondula na olive bhisi di ne otala bhisi inde ngalu kala Ngámá na doto-o. <sup>5</sup> Li kpála le namene uo sisiti-e, djua kóto bhú 'bhø uo, i tsia bhili obhulu yala gba uo-o. A bhomu-o lele maka u abhéle bhulu yala gba o lie-o. <sup>6</sup> A bhú uo ne angu nagbite kokpí ngubula me ebha adhi-i de, nakolo li 'kpí inde u andjía nakpokpo engú gba Ebhe-e lie-o. A di bhú uo ne angu nadji engu me akolo ngute. A bhú uo ne angu natu pedje pí doto me ndu olíkabhu ngangá mene doto li ndu nedhinga hana inde u akunda lie.

<sup>7</sup> Nedhinga u andjía nakpokpo 'ngú li Ebhe atima uo ne e lie, enu inde adu bhú tsu 'dú-o há 'gú ne uo. Aní há angu uo, aní tsia bhili uo. <sup>8</sup> Kuo uo atígala li 'ngbé 'hi kpadji na 'ngbé gudhu inde u agi nani Ngámá gba uo lie li kulusi-o. U agisila li gudhu ang-o 'ili. U agisila lili me Sodomu, i du di-e Edjipeto. <sup>9</sup> U ziba de me okpála zi kuo uo-o de. Okpála na ndu bili hana, ne ndu opiga hana, ne ndu okongú hana adú ago natsia okuo uo ngú okpí bata ne ndundu. <sup>10</sup> Okpála na doto

akpí djali li nakpi ka uo-o. U améne anokomia na djali, u tsia dú apu 'he sunda o. U améne mo-o anga opolofeta bhisi bhomu-o amene uo kpékpéke naali.

<sup>11</sup> Engú bini, píta ekpí bata ne ndundu bhomu-o, ewo bini na mukobho ayie agba Ebhe ali bhú uo, u atsia ayie bhúlá. Abhomu-o, 'ngbé tsulu na ngbéngbé ati pí okpála bhende adu natsia uo-o. <sup>12</sup> Opolofeta bhisi bhomu-o atsia adje eli na kpékpéke inde ayie abhúlá. Eli ango-o apa pi uo me: «Yi 'u ei!» U atsia a'u'u abhúlá bhú ndindi me obhulu yala gba uo nde ngatsia uo. <sup>13</sup> Bha bhú nedhinga bhomu-o, kpéke adjigidjo adyiki bili, té gudhu-o atuko. I du me u nde agbo bhusu gudhu-o ne ndundundu ndjikpa-a, akunda napa me adjigidjo bhomu-o adyiki bini bhú káká. Abhomu-o, okpála ketø mananika amu ka adjigidjo ango-o. Obhe atigala-a, tsulu abedhe uo bedhe. U atsia adhøgø Ebhe inde abhúlá-o.

<sup>14</sup> Likabhu bhe na bhisi-e akodho 'kpí akodho. 'E-e! Bhe na bata agó mbia inde?

### *Andjelu na mananika-a a'u toti gba e-o*

<sup>15</sup> Abhomu-o, andjelu na mananika-a a'u toti gba e-o. Oandjelu atsia asula abhúlá kpekpeke me:

«Nau na doto ibili sakpa ngámá gba ya,  
ne Masiya gba e-o.

Ngámá gba ya-a aú duduama ne duduama!»

16 Obhelesi okpála ndjikpa bhisi ne ká badha inde adulu pí odabili na ngámá gba o kala Ebhe-e atutu bhúla o ne kuto. U atsia adhögø Ebhe, 17 u apa me:

«Ebhe Ngámá Apí 'Kpí, ngamu kpála inde uu, inde adu di nani uu, ya ngatoko mu, anga mo opana angu gba mu, ndu 'ngú hana agie lie sakpa mu. Mo otsia au ngámá pépé.

18 Opiga na doto azi nani mbutu li mu naali, la mbia inde-e, ke 'ngú gba mu-o ago pí uo ago. Nedhinga nakodho 'ngú gba okpála inde amu-o akolo.

A ko nedhinga inde mo ogie bádha 'ngú lie pí obalise gba mu opolofeta di ne ndu okpála gba mu-o hana, inde di ngamanga mu, ongbengbengbe ne odjedjedje-o. A ko nedhinga ngú nabhili obhe ngabhølo doto-o.»

19 Abhomu-o, 'ngbé 'ti Ebhe inde abhúlá-a abhulu lie, u atsia au sanduku na gandja-o.\* Ekpí andjengene, mugbálá asula, adjigidjo di ne itimeli na kpekepeke adhika.

## 12

*Engú na ngangamba inde abhaka ølo inde adu nazu*

---

\* **11:19** 11:19 Sanduku na gandja: A ko sanduku inde u abu nani opapala teme inde u aye ofli ndjikpa gba Ebhe-e bhú e-o.

<sup>1</sup> Pipita-a, ma au engú bini na ngangamba ngamene lie abhúlá: a adu ɛlɛ bini inde adyi li kute e ela. Epe adu sa 'dhu ani. A adu bhú 'ndji ani ne ndata na ngámá inde li e ne oikupala ndjikpa ne ká bhisi. <sup>2</sup> Ɖlɛ ango-o adu ne ebhi. Nedhinga ani adu adjeke nazu lie, ani adu natu 'ue ka nazu ka bhú 'bu e-o.

<sup>3</sup> Engú na ngangamba koko amene matá lie abhúlá: a adu 'ngbé kpulu na ngbéngbé. Kute ani adu mbembe má ngua! A adu li ani ne ondji 'ndji mananika, di ne odidi ndjikpa. A adu pí ndu ondji ani hana ne ndata na ngámá. <sup>4</sup> Ani apo té oikupala ne 'so e, ani atsia abala uo kuto. A akunda napa me u po bhúla ndu oikupala hana-a, u tsia gbo bhusu bhusu bata-a, ani abala kuto bhomu-o bini bhú káká. Ani atsia anu alu kala ɛlɛ inde adu akunda nazu-o ngubula me, ni zu ndili li ɛlɛ bhomu-o azú e bha li nedhinga nakoto ka ani-o. <sup>5</sup> Abhomu-o, ɛlɛ-o azu ndili na bhobhoko. Ani aú pí 'ndji ndu opiga hana ne angu. Kolo me-e, u atsia a'e ndili bhomu-o anu ne ani dengo Ebhe, di ne dengo kiti na ngámá gba ani-o. <sup>6</sup> Ɖlɛ-o atsia akpe abhú 'gu li bili inde li Ebhe aleke nani e pi ani, ngú napa me ni ku ani ngubula ekpí kɛtɛ bini, kámá bhisi ne ndjikpa madhia-o.

<sup>7</sup> Abhomu-o, gbele aka abhúlá. Mikaele ne oandjelu gba e agu 'ngbé kpulu-o. Kpulu ango-o atsia aholo di gbele bhú dabili bini ne oandjelu gba e-o. <sup>8</sup> Engú bini, Mikaele ne oandjelu gba e agboko egú-o. Kaka-a, 'ngbé kpulu-o ne oandjelu gba e sia matá bili da nazu abhúlá de. <sup>9</sup> U atsia

abhike 'ngbé kpulɔ-o kilidjo. A ko kpulɔ na didili, inde u nga'i e me Djabulɔ, i dɔ di-e Satana, bhulɔ napite okpála na doto libhomu-o. U abhike ani kuto bhú dabili bini ne oandjelu gba e-o.

<sup>10</sup> Pipita-a, ma adje kpéke eli bini ayie abhálá. Eli ang-o adɔ apa me:

«Nedhinga li Ebhe gba ní-e ngakobho okpála lie akolo!

Mbia inde-e, Ebhe gba ní-e asuno angu gba e me ni ne ngbé Ngámá-a asuno!

Mbia inde-e, angu sakpa Masiya gba ani-o.

Padhá de, anga u abhike bhulɔ napa 'ngú li ondaise ní-e akilidjo,

ngaani kpála inde adɔ apa 'ngú li uo pi Ebhe gba ní-e ngbikpi ne sukpe-o.

<sup>11</sup> Ondaise ní aha angu ani ka ngute gba Ndili Kandelɔ

di ne ka nakpokpo 'li Ebhe pi okpála.

U kpe kuo de, u atsia atse 'kpa li mukobho gba o ngubula me o mumu.

<sup>12</sup> Kaka-a, ne kokpí ne yi okpála inde ngadulɔ bhúbhú hana-a, yi dɔ bhú djali!

A ko la mangua likabhu dho pi yi okpála inde ngadulɔ píla

doto ne yi obhe ngadulɔ bhú 'ngbé 'ngu-o, anga djabulɔ akɔ agba yi akɔ.

Ani abedhe ne egú bedhe, anga ani mbila hana me nedhinga atigala pi ni bedi.»

<sup>13</sup> Li 'ngbé kpulɔ-o au lie me u abhike ni kuto abhike-e, ani aholo nabhike elɔ inde azu igini ndili na bhobhoko bhomu-o. <sup>14</sup> Engú bini, u

aha mbudha 'ngbé ndua pi ɛlɛ bhomɔ-o ngú napa me ani 'ulu, amba ani nu du li bili inde u aleke e pi ani abhú 'gɔ-o. U atsia adɔ akɔ ani oo ngubula kalanga bata ne ndundu me 'ngbé kpɔɔ-o nde to mbolo li ani de. <sup>15</sup> Abhomɔ-o, kpɔɔ-o atsia azie engu bhelé nganda ɛlɛ-o maka ngade 'ngu, da napa me akpe ne ani. <sup>16</sup> Engú bini, doto ago ateteke ɛlɛ-o. Doto abhulu 'bhɛ e, atsia abhi engu li 'ngbé kpɔɔ-o azie e-o. <sup>17</sup> Li bua kpɔɔ-o ake lie ne ɛlɛ-o, ani anɔ aha 'gú ne dú ongisi gba ɛlɛ-o, obhende ngamanga Ebhe inde di ngalila kɔkɔɔ 'ngú inde li Yesu ambamba ta e-o. <sup>18</sup> Pipita-a, 'ngbé kpɔɔ-o anɔ adɔ pí sike lingo 'ngbé 'ngu.

## 13

### *'Ngbé kpɔɔ-o aha angu gba e pi nɔte koko*

<sup>1</sup> Pipita-a, ma au enɔ bini ngakoto abhú 'ngbé 'ngu. 'Di ani adɔ ndjikpa, 'ndji ani adɔ mananika. Ani adyi ndata na ngámá ne ndɔ odi e hana. Ani atsia adyi di o'ili nasobho Ebhe ne pí 'ndji e hana. <sup>2</sup> Enɔ inde ma au e adɔ maka sia. Odɔ ani adɔ maka bhe gba onɔte, 'bhɛ ani adɔ maka 'bhɛ kingbi. 'Ngbé kpɔɔ-o aha angu na ngbéngbé gba e pi enɔ-o. Enɔ-o atsia adɔ pí kiti na ngámá gba ani-o. <sup>3</sup> Suka ondji ani adɔ mɔgito me u abi eka bhe na mɔgwe mɔgwe, engú bini eka na mɔgwe mɔgwe ango-o atsia ambe. Engú bhomɔ-o atsia angamba okpála na doto libhomu. Kaka-a, u atsia akpata enɔ bhomɔ-o. <sup>4</sup> Ndɔ okpála hana atsia aholo nadhɔgɔ 'ngbé kpɔɔ-o, anga ani aha angu pi enɔ-o. Ndɔ okpála hana

adhøgø di enu-o ne napa me: «A ko da inde maka enu inde? Ati da nagu ani da?»

<sup>5</sup> U aha nani kpadji pi enu bhomu-o me ani du napa oeli na 'ngbé 'ndji, amba ani du di nasobho Ebhe. U aha angu pi ani ngú namene engú bhomu-o ngú epe ndjikpa badha ne ká bhisi.

<sup>6</sup> Ani aholo napa osisiti 'ngú li Ebhe, ne nasobho 'li ani di ne nasobho bili inde ani adudu li e, di ne okpála hana inde adudu abhúlá-o. <sup>7</sup> U aha kpadji pi ani me ani gu okpála gba Ebhe di ne naha angu uo. U aha angu pi ani pi 'ndji okpála na ndu bili hana, ne ndu opiga hana, ne ndu okongú hana.

<sup>8</sup> Ndu okpála na píla doto hana inde u ye nani 'li o bhú bhuku na mukobho-o de-e, adhøgø ani. Bhuku angu-o, a ko bhe gba Ndili Kandøø inde u abhøø e-o. U ye nani 'li uo bhúbhú de, nayie maka li Ebhe abho doto lie-o.

<sup>9</sup> Yi dje ndjindji, i du me a nde li yi ne djedje nadje 'kpi ko.

<sup>10</sup> Kpála inde ayo me ani nu bhú tikpu-o,  
anú bha bhú tikpu.

Kpála inde ayo me ani kpi li mbotia-a,  
akpi bha li mbotia.

Kaka-a, a ayo me okpála gba Ebhe-e du ne 'ndjá  
bua,  
di ne nabhuka .

### *Enu koko akoto bhú doto*

<sup>11</sup> Pipita-a, ma au enu koko ngakoto bhú doto. Adu bhú 'ndji ani ne didi bhisi maka ndili kandøø. Ani atsia adu agama 'ngú maka 'ngbé kpu. <sup>12</sup> A adu di bhú ani ne angu maka angu

inde adu bhú enu bhende akoto bhú 'ngbé 'ngu-o. Aní adu amene 'he ne di kala enu bhe na 'ngbé 'ngu-o. Aní adu apa pí ndu okpála na doto hana me, u dhөгө enu na 'ngbé 'ngu lí eka na muge muge gba e ambe-o.

<sup>13</sup> Enu bhe na bhisi inde-e adu amene ongamba 'ngú na ngbengbengbe. Aní adu belegu nagbele djua nayie abhúlá nakø pí doto. Aní adu amemene lí djila ndu okpála hana. <sup>14</sup> Aní adu apipite ndu okpála na píla doto hana inde u ye naní 'lí o bhú bhuku na mokobho-o de-o. Aní adu apipite uo ne ongamba 'ngú inde aní adu amene e lí djila enu na 'ngbé 'ngu-o. Aní adu akata uo me u bho kulu enu inde abi nako eka na muge muge lí mbotia, eka ango-o atsia ambe-o.

<sup>15</sup> Enu na bhisi-e asia angu ngú nato ewo bhú kulu enu na bini-o, ngubula me a du nagama 'ngú, amba a du nabhili ndu okpála hana inde i dhөгө ní de-o. <sup>16</sup> Enu ango-o aye tele lí ndu okpála hana. Aní aye lí okpála koko lí 'kpa o na kokpa, aní aye lí okpála koko pídi o, abana i du mboye ndili, abana i du bhele kpála, abana i du bhulu tia, abana i du bhulu ndibhili, abana i du bali, abana i du kpála inde bhú bali ade. <sup>17</sup> Kpála bini tí da nakala 'he de, i du di-e natsindji 'he de, i du me tele nde lí kute aní ade-o. Tele ango-o, a ko 'lí enu bhomu, i du di-e alo na 'lí aní-o. <sup>18</sup> A inde-e nedhinga inde ayo ne imbilangu. Kpála inde ne imbilangu-o tí da nambila ta alo gba enu-o, anga alo ango-o viti bini ne 'lí kpála-kuti. Alo ango-o kámá madhia, ndjikpa madhia ne ká madhia.

# 14

## *Okpála inde li Ndili Kandөлө-o akala o*

<sup>1</sup> Ma atsia matá 'kpí, ma au Ndili Kandөлө-o me ani nde alu pí eta na Siona . Okpála ketө kámá bini, ndjikpa badha ne ká badha inde u aye 'li Ndili Kandөлө di ne 'li 'Dyi ani pidi o alulu de ani. <sup>2</sup> Pipita-a, ma adje eli ayie abhúlá. Eli ango-o adu mugito me a ko gili wowo 'ngu, maka gili mugbálá na kpekpeke. Eli inde ma adje e adu maka gili dumu, nedhinga li obhubhulu-o abhibhi lie-o. <sup>3</sup> Bhiti okpála bhomu-o adu ali etsi na mbia kala kiti na ngámá, di ne kala okpála badha na ngangamba ne obhelesi okpála-o . Kpála bini ti da nale etsi ango-o de, bha bini okpála ketө kámá bini, ndjikpa badha ne ká badha li Ndili Kandөлө-o akala o píla doto-o. <sup>4</sup> Ngauo-o, u siti lio ne olisi de. U alila lio bubu kala Ebhe. U ngakpata Ndili Kandөлө-o ne ndu bili hana ani nganu li e-o. Ani akala nani uo bhú ká okpála-kuti ngubula napu uo pi Ebhe di ne pi e bhubhulu maka gina ngua. <sup>5</sup> Eu koto nani bhú 'bhө uo belegu de bini. Engú na sisiti napapa li uo ade.

## *Oandjelu bata akpokpo 'ngú pindji lele maka li Ebhe akódho 'ngú lie-o*

<sup>6</sup> Pipita-a, ma au andjelu koko. Ani adu akodho 'kpí abhúlá tsutsu naali maka edhu. Adu ka ani ne Bádha Ngali na duduma inde ani adu akpokpo e pi okpála na píla doto, okpála na ndu bili hana, ne ndu opiga hana, ne ndu okongú hana. <sup>7</sup> Ani adu nasusula kpekpeke me: «Yi kpe Ebhe, amba

yi dhөгө di ani! Padhá de, anga nedhinga me ani kodho 'ngú gba okpála na doto akolo. Yi dhөгө kpála inde abho kokpí ne doto ne 'ngbé 'ngu di ne okpongu-o.»

<sup>8</sup> Pipita-a, andjelu na bhisi-e akpata bhe na kalanu-o. Ani adu apa me: «Babilona na ngbéngbé-e ati! A ati na paká paká! Ani ase ndu opiga hana ne siti vino gba e-o. Vino ango-o, a ko zabhe inde ani ngamene e-o!»

<sup>9</sup> Pipita-a, andjelu na bata akpata obhe bhisi bhomu-o. Ani adu asusula me: «Li kpála dhөгө enu-o, ne kulu ani-e, li u aye di tele gba enu-o pidi e, i du di-e li 'kpa e, <sup>10</sup> kpála ango-o ndjí bhadi vino na ke 'ngú gba Ebhe-o! Ebhe atúko ngili vino ango-o bhú kópo na ke 'ngú gba e-o! Ngua kpála bhomu-o asía likabhu bhú djua na baluti kala oandjelu na bububu di ne kala Ndili Kandole-o. <sup>11</sup> Ngúwa na djua inde ngato mbolo li uo-o nga'u abhúlá ndu 'kpí hana. Ndu okpála hana inde ngadhөгө enu, inde di ngadhөгө kulu ani, inde u aye tele gba ani-e li o-o, ngazu likabhu ngbikpi ne sukpe. U guguo de.» <sup>12</sup> Kaka-a, a ayo me okpála gba Ebhe inde ngakpata líli gba ani-e, inde di ngalila nabhuka gba o bhú Yesu-o du ne 'ndjá bua.

<sup>13</sup> Pipita-a, ma adje eli bini ayie abhúlá, a atsia apa muma me: «Ye me: <A ko djali pi okpála inde amu nayie pi mbia inde-e me u nde abhuka Ngámá-o!> Bu Bhobua apa me: <A na paká, u guo ka bhiti kulu u amene e guguo. Padhá de, anga kulu gba uo-o ngakpata uo.»»

*Nedhinga na'e nguwa na píla doto*

<sup>14</sup> Pipita-a, ma atsia matá 'kpí, ma au ndindi bini na bubu. A adu pí ndindi ango-o ne ehe maka kpála. A adu pí 'ndji ani ne ndata na ngámá inde u abho e li olo. A adu sakpa ani ne dhádha bini na dhedhe.† <sup>15</sup> Abhomu-o, andjelu koko bini akoto bhú 'ngbé 'ti Ebhe inde abhúlá-o. Ani atsia asula pi kpála inde adu pí ndindi-e me: «Ha dhádha gba mu-o, amba mu holo na'e nguwa abhiye. Padhá de, anga nedhinga na'e'e-e akolo. Nguwa na píla doto abhele ngú nakoko abhele!» <sup>16</sup> Abhomu-o, kpála inde adu pí ndindi-e apu ne dhádha gba e píla doto. Nguwa na píla doto atsia a'e lie.

<sup>17</sup> Pipita-a, andjelu koko akoto bhú 'ngbé 'ti Ebhe inde abhúlá-o. A adu di ka ani ne dhádha na dhédhé.

<sup>18</sup> Pipita-a, andjelu koko akoto li bili natsulu enu pi Ebhe-o. A adu bhú ani ne angu pí djua. Ani asula pi bhe adu ne dhé dhádha sakpa e me: «Ha dhé dhádha gba mu-o, amba mu ko vino inde píla doto-o nedi. Líí-e ambe.» <sup>19</sup> Andjelu-o atsia apu ne dhádha gba e píla doto. Ani atsia ako vino na píla doto-o. Ani atsia abu bhú 'ngbé ngbengөлө na ke 'ngú gba Ebhe-o. <sup>20</sup> U agbe ngbengөлө-o bhú gudhu-o kilidjo, u atsia api lí vino-o. Abhomu-o, ngute atsia aze bhú ngbengөлө-o. Ngute ango-o anu a'u nakolo li 'bhө opunda. A atsia ayangba masikpe de kilometele kámá bata.

## 15

---

† 14:14 14:14 Tsia bhú Dan. 7:13.

*Oandjelu mananika ago ne olikabhu mananika*

<sup>1</sup> Pipita-a, ma atsia 'kpí, ma au matá engú na ngangamba koko akoto abhúlá. A adu engú na ngbéngbé inde di na tsulu tsulu. Ma au oandjelu mananika, a adu sakpa uo ne gba olikabhu mananika. Pipita-a, likabhu koko matá ade, anga a ngasuno ke 'ngú inde li Ebhe apana e li soso-o ngae.

<sup>2</sup> Pipita-a, ma au ehe bini maka 'ngbé 'ngu i mana bitolobi, a atsia amata lie ne djua. Ndu okpála hana inde aha nani angu enu-o, inde aha di angu kulu ani bhú dabili bini ne alo inde ngasuno 'li ani-e, alulu pí 'ngbé 'ngu ango-o. A adu sakpa uo ne odumu li Ebhe aha e pi uo-o.

<sup>3</sup> U adu ali etsi gba Moidje , bali gba Ebhe-o, di ne etsi gba Ndili Kandelø-o . Etsi ango-o adu me:  
«Ebhe Ngámá Apí 'Kpí,

okulu gba mu-o ngbengbengbe.

A di na ngangamba.

'Ngbé Ngámá gba okpála,  
okpadji gba mu-o ne okukulu kpadji,  
a la di ngbingbili.

<sup>4</sup> A mánga mu de da, Ngámá?

A adhégo mu de da?

Padhá de, anga mu bubu ngamu kpi mu kpi.

Ndu opiga hana agó atutu lipuku o kala mu.  
Padhá de, anga mo opana ngbili 'ngú gba mu-o  
pi uo apana.»

<sup>5</sup> Pipita-a, ma atsia 'kpí, ma au 'ngbé 'ti Ebhe inde abhúlá-a abhulu lie. A adu bhúbhú ne 'ti ngbangbali li Ebhe adu asuno lie bhú e-o.

<sup>6</sup> Abhomu-o, oandjelu mananika inde adu ne gba

olikabhu mananika sakpa o-o akoto bhú 'ngbé 'ti Ebhe-o. U adyidyí obongo inde na kpéke mase,\* inde avuvu má tuu tuu! U agbigbite di mbulu o ne mukabha na olo. <sup>7</sup> Suka okpála badha na ngangamba-a aha kópo na olo mananika pi oandjelu mananika-o. Okópo ango-o adu bedhe bedhe ne oke 'ngú gba Ebhe inde bhú mukobho duduma ne duduma-o. <sup>8</sup> Abhomu-o, 'ngbé 'ti Ebhe-e abedhe ne ngúwa bedhe ka zi Ebhe di ne angu gba ani-o. Kaka-a, kpála bini ti da nali bhú 'ngbé 'ti Ebhe-e de, nakolo li nedhinga li olikabhu mananika li oandjelu-o adu ne e amene lie lie-o.

## 16

### *Okópo na ke 'ngú gba Ebhe*

<sup>1</sup> Pipita-a, ma adje kpéke eli ayie ne bhú 'ngbé 'ti Ebhe . Eli ango-o apa pi oandjelu mananika-a me: «Yi nuanu, amba yi tuko okópo na ke 'ngú mananika gba Ebhe-e píla doto!»

<sup>2</sup> Andjelu na bini-e anu, ani atsia atuko ke 'ngú inde adu bhú kópo gba e píla doto. Abhomu-o, oeka na sisiti, inde di nake make atsia aze li kute ndu okpála hana inde adu ne tele gba enu-o, inde adu di natoko kulu ani-o.

<sup>3</sup> Andjelu na bhisi-e atuko ke 'ngú inde adu bhú kópo gba e pí 'ngbé 'ngu. 'Ngbé 'ngu-o akolo maka ngute kpála inde akpi. Abhomu-o, ndu ohe hana inde adu bhú 'ngbé 'ngu-o me a nde nu-o atsia amu.

---

\* **15:6** 15:6 Bongo na kpéke mase: U abho nani bongo ango-o li lene.

<sup>4</sup> Andjelu na bata-a atuko ke 'ngú inde adu bhú kópo gba e bhú ongade 'ngu, ne bhú okpongu. A atsia adji lie ngute. <sup>5</sup> Ma atsia adje andjelu inde adu ne angu pí ongu-o ngapa me:

«Ngamu kpála na bubu, inde uu, inde adu di nani uu-o, mu ne ngbili kpála ,  
anga mo opana ngbili 'ngú gba mu-o.

<sup>6</sup> Padhá de, anga okpála abhili okpála gba mu-o di ne opolofeta .

Mo oha bhadi pí uo ngute me u ndji.

U asia engú inde ati ne uo-o!»

<sup>7</sup> Pipita-a, ma adje eli akoto pí misa natsulu mungotsi pí Ebhe-o. Eli ang-o adu apa me:

«A ko paká, Ebhe Ngámá Apí 'Kpí,  
ndu 'ngú mo okodho e hana-a,  
mo okodho li lelele,  
a la bhadi ngbingbili.»

<sup>8</sup> Andjelu na badha-a atuko ke 'ngú inde adu bhú kópo gba e píla ela. Ani atsia aha kpadji pí ela me a atsulu okpála ne djua gba e-o.

<sup>9</sup> Abhomu-o, bili akpa na mugwe mugwe, okpála atsia atsulu kaka. U asobho 'li Ebhe inde adu bhú e ne angu ngú natima ngua oke 'ngú bhomu-o. Engú bini, u dji bua o ngú nadhogø Ebhe de.

<sup>10</sup> Andjelu na bhuluvue atuko ke 'ngú inde adu bhú kópo gba e pí kiti na ngámá li enu-o adu nadu pí e-o. Abhomu-o, biti agba kuti-ngámá gba enu-o. Okpála atsia adu nazu 'mi o ka likabhu.

<sup>11</sup> U adu asobho 'li Ebhe abhúlá ka olikabhu gba o di ne ka oeka inde adu li uo-o. Engú bini, u dji bua o li osisiti 'ngú inde u adu namene e de.

<sup>12</sup> Andjelu na madhia-a atuko ke 'ngú inde adu bhú kópo gba e pí ngade 'ngu na Efalata. Engu-o atsia a'ulú hana ngú naka kpadji pí ongámási inde ngayie ne ndjongu-o. <sup>13</sup> Abhomu-o, ma au osisiti bua bata ngakoto bhú 'bhé 'ngbé kpulu-o ne bhú 'bhé enu-o, di ne bhú 'bhé polofeta na eu-o. Osisiti bua ango-o adu maka omabianga. <sup>14</sup> A ko osisiti bua inde li djabulu atima o-o. U adu amene ongamba 'ngú . U adu nanu agba ongbengbe ongámási na doto libhomu ngú napo bhúla uo ngabula gbele na 'ngbé 'kpí gba Ebhe Apí 'Kpí-o.

<sup>15</sup> Ngámá Yesu apa me: «Tsitsia! Ma ngago maka bhulu 'zi! A ko djali pí kpála inde li zuku, inde ngalila obongo gba e li kute e ngú napa me ni anú ndumbu de, me ni asia numu de ka nakoto bhú djila okpála ndumbu-o.»

<sup>16</sup> Osisiti bua apo bhúla ongbengbe ongámási li bili inde u a'i e bhú eli gba omaYuda me Alamagedo.

<sup>17</sup> Andjelu na mananika-a atuko ke 'ngú inde adu bhú kópo gba e atu 'kpí. Kpéke eli bini atsia akoto abhú 'ngbé 'ti Ebhe. A ayie li pápá na kiti na ngámá-o. A apa me: «A amene lie amene!» <sup>18</sup> Abhomu-o, ekpí andjengene, mugbálá asula, adjigidjo na kpekpeke adhika. Ngua 'ngú bhomu-o mene nga nani lie kalanu de, nayie maka li Ebhe abho kpála píla doto lie-o! <sup>19</sup> 'Ngbé gudhu na Babilona agugumu bhusu e ne ndundundu bata. Abhomu-o, ndu ogudhu na okuti hana atuko kuto. Abhomu-o, Ebhe atsia a'o nga la 'to e 'to 'ngbé gudhu na Babilona. Ani

atsia aha pi ani kópo na vino na ke 'ngú gba e na sisiti inde adu adula bhú e madula me ani ndji. <sup>20</sup> Ndu okpeme hana atsia angita, ndu oeta hana atsia angita di. <sup>21</sup> Ongbengbe itimeli na titili masikpe de kilo ndjikpa badha atsia abala pí okpála. Abhomu-o, okpála atsia asobho Ebhe ka likabhu na itimeli-o. Padhá de, anga likabhu ango-o adu kpekpeke na kuo kuo.

## 17

### *Nakodho 'ngú gba okpála na Babilona*

<sup>1</sup> Abhomu-o, suka oandjelu mananika inde i de ne okópo na ke 'ngu-o sakpa o ago apa muma me: «Gogo, ma asúno pi mu lele maka li Ebhe akodho 'ngú gba 'ngbé bhulu zabhe-e lie-o. A ko 'ngbé gudhu inde u ayiki e lingo ongbengbe ongade 'ngu bhelé. <sup>2</sup> Ongbengbe ongámási na doto amene zabhe ne ani. Okpála na doto atsia alangba ne vino gba ani na zabhe-o.»

<sup>3</sup> Abhomu-o, Bu Bhobua abedhe ma, Andjelu-o atsia anu ne ma abhú mili bili. Ma au elo bini inde adu pí enu na mbembe má ngua! Enu ango-o abuku kute e libhomu ne o'ili inde ngasobho Ebhe, 'ndji 'ndji adu li ani mananika di ne didi ndjikpa. <sup>4</sup> Elo ango-o adyi obongo na mbembembe na tia naali. Ani atsia adyi omagege na olo ne obhe na teme na mase naali di ne omayaka li kute e bedhe. A adu sakpa ani ne kópo na olo inde abedhe ne zibotu bhú e bedhe ka zabhe gba ani-o. <sup>5</sup> U aye pidi ani 'ili bini inde li ta e awo lie mawo. 'Ili ango-o me: «BABILONA NA NGBÉNGBÉ, 'HI OBHULU ZABHE DI NE OSISITI 'NGÚ NA

DOTO-O.» <sup>6</sup> Ma au me ɔlɔ ango-o alangba ne ngute okpála gba Ebhe-o, ngute obhe u abhili o ka u abhuka Yesu lie-o. Ma au anɪ lie, ma angamba naali.

<sup>7</sup> Abhomɔ-o, andjelu-o apa mɔma me: «Mɔ ngangamba ka ni? Ngama-a, ma ambámba ta 'ngú gba ɔlɔ bhomɔ-o ne enɔ inde abi ani-e pi mɔ, enɔ inde li e ne 'ndji 'ndji mananika di ne odidi ndjikpa-o. <sup>8</sup> Enɔ inde mo ou e bhomɔ-o, adɔ nani tété. La-a, ani matá ade. Ani akóto bhú tsu 'dú-o, ani tsia nú bhú ngita gba e-o. Okpála na doto inde u ye nani 'li o bhú bhuku na makobho-o de nayie maka nani li Ebhe abho doto lie, angámba li nau enɔ-o. Padhá de, anga ani adɔ nani tété, la-a ani matá ade. Engú bini, ani akóto matá ne toto.

<sup>9</sup> A ayo mbia inde-e nadɔ ne imbilangu di ne bua nakpokpo kú 'ngú. Ondji 'ndji mananika-a, a ko oeta mananika inde li ɔlɔ-o ngadɔ pí e-o. A ko di ongbengbe ongámási mananika-o. <sup>10</sup> Obhe bhuluvue bhú ká uo-o, kulu gba uo-o andjia, bhe na madhia ngabha bhú kulu, bhe na mananika-a go nga de. Ani agó lie, ani améne bha nedhinga masudha. <sup>11</sup> Enɔ inde adɔ nako tété-e, inde matá tété ade bhomɔ-o, ngaani makpe-e, a ko 'ngbé ngámá na madjina. Ani bhú ká ongbengbe ongámási mananika-o. Ani adji bhú ngita gba e-o.

<sup>12</sup> Odidi ndjikpa inde mo ou e bhomɔ-o, a ko ongbengbe ongámási ndjikpa inde i 'ɔ nga pí kiti na ngámá de-o. Engú bini, u asía angu ngú nau bhú dabili bini ne enɔ-o ngú saa bini.

<sup>13</sup> Ndɔ ongámási ndjikpa bhomɔ-o hana bha ne

koli mabhundja bini. U ne gũmũ naha angu di ne ngámá gba o ngú namene kulu lio pĩ enũ-o. <sup>14</sup> U agú gbele ne Ndili Kandøø-o , la-a, Ndili Kandøø-o ahá angu uo. Padhá de, anga a ko Ngámá gba ongámási, a ko 'Ngbé Ngámá gba ongbengbe ongámási. Omaha Ndili Kandøø inde anì a'ì o-o, anì atsia alo o-o, u ahá bhadi angu uo bhú dabili bini ne anì. U ngakpata Ndili Kandøø-o ne bua o bini.»

<sup>15</sup> Pipita-a, andjelu-o apa matá mũma me: «Oengu inde mo ou e li bìli inde li øø na zabhe alũ li e bhomũ-o, a ko okpála na ndũ bili hana, a ko bhiti okpála, a ko opiga di ne okongú. <sup>16</sup> Odi 'nũ ndjikpa ne enũ inde mo ou e bhomũ-o, ayála øø na zabhe-o. U bhá 'he li anì hana, u a'ó ká anì ndumbu, u azú mbilika anì, u tsia bú dú anì bhú djua. <sup>17</sup> Padhá de, anga Ebhe a'o li bua uo me u mene mækũnda gba anì-o. U améne ne bua bini me o ha angu na ngámá gba o me o mene kulu lio nedi pĩ enũ-o, nakolo li nedhinga li 'li Ebhe améne lie lie-o. <sup>18</sup> La di-e, øø inde mo ou e-e, a ko 'ngbé gũdhũ inde ngau pí ongámási na doto-o.»

## 18

### *Natì ka gũdhũ na Babilona*

<sup>1</sup> Pipita-a, ma au andjelu koko ayie abhúlá ngakø kuto. A adũ bhú anì ne angu na ngbéngbé. Abhomũ-o zì anì abha doto libhomu. <sup>2</sup> Anì asũla kpekpeke me:

«'Ngbé Babilona ati-e ngae! 'Ngbé Babilona ati-e ngae!

A akolo ibili bìli li odjabũlũ ngadũlũ li e,

bili inde li ndu osisiti bua hana ngadulu li e.

A bhomu-o bili li odhu ne onu inde kala Ebhe  
sisiti-e ngadulu li e-o.

<sup>3</sup> Padhá de, anga ndu okpála na doto hana andji  
siti zabhe gba ani-e  
maka okpála andjindji vino lie-o.

Ongbengbe ongámási na doto amene zabhe ne  
ani,

obhulu natsindji 'he na pála doto atsia akpo  
di li angu na bhiti tia gba ani-o.»

<sup>4</sup> Pipíta-a, ma adje eli koko ayie abhúlá. A adu  
apa me:

«Ngayi okpála gba ma-a, yi ze bhú Babilona zeze,  
amba yi améne siti 'ngú bhú dabili bini ne  
ani de,

ngú napa me yi asía olikabhu inde abháka ani-e  
bhú dabili bini ne ani de.

<sup>5</sup> Padhá de, anga osisiti 'ngú gba ani-e apo 'ta e  
akolo makolo abhúlá.

Ebhe atsia abhundja osisiti 'ngú gba ani-o.

<sup>6</sup> Yi mene ani maka ani amene okpála koko lie-o.

Yi gie siti 'ngú ani amene e pi ani  
bhutsibhutsi bhisi.

Yi ha pandi inde ane bhe gba ani-e ne kpéke  
bhutsibhutsi bhisi-e pi ani

bhú kópo inde ani adu a'o pandi gba e bhú  
'bhø okpála ne e ko.

<sup>7</sup> Ani adu akpi ndjili naali bhú asasaua na tia gba  
e-o.

Kaka-a, yi gie di likabhu ne mulo polo pi ani  
li lelele.

Padhá de, anga ani ngapa li bua e me:

«Ma adu pí kiti na ølø gba ngámá, ma ne økø  
ade,

ma adú galikpe bhú talia de.»

<sup>8</sup> Kaka-a, ndu okpekpeke da 'ngú inde a'o lie pi ani-e agó galikpe atí pí ani li koli 'kpí bini ndundu hana.

Okpekpeke da 'ngú ango-o ngae inde: nakpi ka okpála, talia di ne gumu, li djua tsia tsulu di ani hana má kpəkəbhə! Padhá de, anga Ngámá Ebhe inde akodho 'ngú gba ani-e, ne kpála na angu.»

<sup>9</sup> Abhomu-o, ongbengbe ongámási na doto inde-e amene zabhe bhú dabili bini ne ani. U akpi ndjili ne ani li bhiti tia gba ani-o. Li u aú ngúwa djua atsulu ani-e lie, u kú 'gbá, u tsia lópolo di lio ngú ani. <sup>10</sup> U alulu de ani tsutsu ka nakpe likabhu inde abhaka ani-o. U tsia pá me:

«A ko likabhu na ngbéngbé pi mu, Babilona!

Mu ne 'ngbé gadhu, mu la di ne angu.

La-a, Ebhe akodho 'ngú gba mu-o bha bhú saa bini padhá!»

<sup>11</sup> Obhulu natsindji 'he di ngaku 'gbá, uo di bhú talia li 'ngú gba ani-o. Padhá de, anga kpála bini ngakala matá ehe gba uo-o ade. <sup>12</sup> Abana i du di-e olo, ne oaladja, ne oteme na mase ne omayaka, kpála bini ngakakala ade. Abana i du obongo na kpéke mase, ne ombembe obongo na zizi, ne obongo inde u abho e li dele gba okəkó, kpála bini ngakakala ade. Abana i du ndu djua ondula na babadha sese hana, abana i du ndu djua oehe inde u abho e li 'te 'ya hana di ne obhe u abho e li ondula na mase hana, ne obhe u abho e li teme, kpála bini ngakakala ade. Abana i du di-e ndu djua kalase

hana, kpála bini ngakakala ade. <sup>13</sup> Abana i dũ oehe ne okpála koko inde u aleleke se bili abhú 'ti ne e, ne mila di ne omungotsi koko, ne bandele, kpála bini ngakakala ade. Abana i dũ pandi, ne emũ, ne fufú, kpála bini ngakakala ade. Abana i dũ obagala, ne okandøø, ne opunda, ne okpulukpulu, kpála bini ngakakala ade. Abana i dũ 'lá kpála-kuti, kpála bini ngakala sũsũka ade.

<sup>14</sup> Obhũlũ natsindji 'he bhomũ-o apa pi gũdhũ bhomũ-o me:

«Ndũ oehe inde mo okũkũnda e hana andjia gba mũ andjia!

Ndũ otia gba mũ di ne obabadha 'he gba mũ-  
O  
andjia ka mũ andjia,

u ú matá gba mũ belegũ de bini!»

<sup>15</sup> Obhũlũ natsindji 'he inde akpo li tia na gũdhũ angoo alũlũ de ani tsutsu ka nakpe likabhu inde abhaka ani-o. U adú aku 'gba, u tsia lópolo di lio ngú ani. <sup>16</sup> U adú apa me:

«A ko likabhu na ngbéngbé pi yi,  
okpála na 'ngbé gũdhũ-o!

Yi adyi li kute yi babadha bongo inde na  
kpéke mase.

Yi atsia adyi di li yi obongo na mase naali inde  
na mbembe má ngua,  
inde li e ne zizi.

Yi adyi di omagege na olo bhú dabili bini ne  
oteme na kpéke mase di ne omayaka.

<sup>17</sup> Ndũ 'he bhomũ-o hana angíta bha li saa bini  
má kpikili!»

Abhomũ-o, ndũ obhũlũ nadjele zabũ hana,  
bhú dabili bini ne okpála inde u abi o, okpála

nadhuku pí 'ngbé 'ngu bhú dabili bini ne obhulu nagili tia pí 'ngbé 'ngu-o alulu mbo tsutsu. <sup>18</sup> U atsia adu asusula ka nau nguwa adu aze ka natsi ka gudhu-o me: «A akpo 'ndji e li 'ngbé gudhu inde-e ne bhedho?» <sup>19</sup> U adu aba embi bhú 'ndji o, u adu aku 'gbá, u atsia adu alopolo lio me: «A ko likabhu na ngbéngbé pí yi, okpála na 'ngbé gudhu-o!

Bhiti tia gba yi-e ngae inde li okpála inde ngamene kulu pí 'ngbé 'ngu-o akpo ka e ko.

La-a, ndu 'he bhomu-o hana andjia bha li saa bini má pikili!»

<sup>20</sup> Ngayi okpála inde abhúla-a, yi kpi ndjili li nakpi ka gudhu ango-o!

Ngayi omaha Ebhe, ne yi obhulu titima gba Ebhe, di ne yi opolofeta , yi kpi ndjili!

Padhá de, anga Ebhe akodho 'ngú gba ani-e ka siti 'ngú inde ani amene e li yi ko!

<sup>21</sup> Abhomu-o, andjelu bini na angu aha teme bini maka 'ngbé teme nadyi ngano, ani atsia atumba bhú 'ngbé 'ngu ne napa me:

«U atumba bhadi ngbé gudhu na Babilona ne kpeke me, kpála bini ú matá galikpe ani de.

<sup>22</sup> Obhulu nabhi dumu bhí matá galikpe agba mu de.

Obhulu na'u toti 'ú matá galikpe agba mu de. Obhulu nali 'tsi lí matá galikpe agba mu de.

Obhulu ikalana dú matá di agba mu de.

Okpála dyí di matá ngano agba mu de.

<sup>23</sup> Zi tala dú matá di agba mu de.

U djé matá di 'li okpála inde aha lio agba m̀ de.

Padhá de, anga obhul̀ natsindji 'he inde adu bhú gudhu gba yi-e,  
adu ongbengbe kpála na doto.

Obhul̀ kobha gba yi-e apite ndu okpála hana.

<sup>24</sup> Okpála na Babilona abhili opolofeta,  
ne okpála gba Ebhe di ne ndu okpála hana  
inde u abhili o p̀la doto-o.»

## 19

### *Etsi ngú nadhøge Ebhe*

<sup>1</sup> Pipita-a, ma adje eli kpekpeke ayie abhúlá.  
Eli angoo adu mugito me bhiti okpála ngagama  
'ngú. U adu apa me:

«Aleluya! Yi toko Ebhe, Ngámá gba ní-o!  
A ko mukobho, a ko Ebhe na sangu , a ko  
Ebhe na angu!

<sup>2</sup> Engú aní ngakodho e hana-a, aní ngakokodho  
li lelele, a la bhadi ngbingbili.

Padhá de, anga aní akodho 'ngú gba 'ngbé  
bhul̀ zabhe inde adu nako  
asiti 'ndji okpála na doto ne zabhe gba e ko.

Aní atsia agisila engú nabhili obalise gba e li  
aní.»

<sup>3</sup> U atsia apa matá me:

«Aleluya! Yi toko Ebhe, Ngámá gba ní-o!  
Ngúwa inde ngakoto bhú gudhu-o nga'u  
abhúlá duduma ne duduma.»

<sup>4</sup> Obhelesi okpála ndjikpa bhisi ne ká badha bhú dabili bini ne okpála badha na ngangamba-a atutu lipuku o kuto, u atsia adhogø Ebhe inde ngadu pi kiti na ngamá-o. U adu apa me:

«A du moko! Aleluya! Yi toko Ebhe, Ngamá gba ní-o!»

*Anokia gba Ndili Kandø-o*

<sup>5</sup> Abhomu-o, eli bini ayie ne li pápa na kiti na ngamá-o. Eli ango-o apa me:

«Yi toko Ebhe gba ní-o, ndu yi obalise gba ani-e hana,

ngayi okpála inde ngamanga ani-o, abana ngayi ongbengbe okpála ne yi odjedjedje!»

<sup>6</sup> Pipita-a, ma adje tolo mugito me a ngagama 'ngú ne bhiti okpála. Tolo ango-o adu mugito me a ko gili wowo 'ngu, mugito me kpéke mugbála ngasusula ngae. A adu apa me:

«Aleluya! Yi toko Ebhe, Ngamá gba ní-o!

Padhá de, anga a ko Apí 'Kpí.

Ani ngau maka ngamá.

<sup>7</sup> Ní kpi ndjili, amba ní du di bhú djali!

Ní dhøø ani!

Padhá de, anga nedhinga na anokia na kuva gba Ndili Kandø-o akolo,

wala\* ani aleke lie aleke.

<sup>8</sup> U aha bongo inde na kpéke mase pi ani.

Zi bongo ango-o ngasu masu, zibotu bini tété ade.»

---

\* **19:7** 19:7 Ndili Kandøø ne wala e: Ndili Kandøø-o, a ko Kilisito , wala ani-e, a ko Piga gba Ebhe. Tsia bhú Efe. 5:25, 32.

(Bongo na kpéke mase bhomu-o ngasuno me okpála gba Ebhe-e amene obabadha kulu lio pi ani.)

<sup>9</sup> Abhomu-o, andjelu-o apa muma me: «Ye engú inde-e me: <A ko djali pi okpála inde u a'i o bhú anokomia na kava gba Ndili Kandole-o!>» Aní atsia apa matá muma me: «A bhomu-o okukulú eli inde ayie ka Ebhe-o.»

<sup>10</sup> Abhomu-o, ma atutu lipuku ma kuto bhú li 'dhu ani ngú nadhogè ani. Engú bini, ani apa muma me: «Mo oméne mo-o de. Ma ne bali gba Ebhe maka mu. Ma bhađi maka ondaise mu inde ngakpokpo kukulu 'ngú inde li Yesu ambamba 'ta e-o. Tutu mangbo lipuku mu kala Ebhe.»

Padhá de, anga ngbili 'ngú inde li Yesu akpokpo e ngaha angu pi opolofeta ngae.

*Kpála inde adu pí punda na bubu-o aha 'gú ne obhulu yala gba e*

<sup>11</sup> Pipita-a, ma au kokpí abhulu lie. Abhomu-o, punda bini na bubu akoto. Kpála inde adu pépé-e, adu 'li ani me: «Kpála inde ngamene kulu lie pi Ebhe ne bua e bini.» Aní ngakodho 'ngú ngbingbili, ani di ngagu egú bhú ngbili 'ngú . <sup>12</sup> Djila ani adu nade maka zi djua. Adu di bhú 'ndji ani ne ondata na ngámá bhelé. U aye 'ili bini li kute ani. Aní ambila bha bini 'ta 'ili angoo ngae.

<sup>13</sup> Aní adyi koti bini inde u azi e bhú ngute-e li kute e. Adu 'li ani me: «'Li Ebhe.» <sup>14</sup> Osudha na abhulá adu akpata ani me u nde a'u'u pí opunda na bububu. U adyidyí obongo na kpéke mase. Bongo angoo adu bubu, zibotu bini du

tété de. <sup>15</sup> Mbotia inde li 'bhø e adu bebedhe-e adu akoto bhú 'bhø ani. Mbotia ang-o adu ngubula nabhili opiga ne di. Ani aú pí 'ndji uo ne angu e hana. Ani tsia pí vino bhú 'ngbé ngbøngølø na ke 'ngú gba Ebhe Ngámá Apí 'Kpí-o. Ke 'ngú ang-o adú nadula madula.† <sup>16</sup> U aye 'ili bini li koti gba ani di ne pí 'ku ani. U aye 'ili ang-o me: «'NGBÉ NGÁMÁ GBA ONGBENGBE ONGÁMÁSi, NGÁMÁ GBA ONGÁMÁSi.»

<sup>17</sup> Pipita-a, ma au andjelu bini, alu tu ela. Ani asula kpekpeke pi ndu odhu hana inde adu adholo abhúla tsutsu naali-e me: «Yi go po bhúla yi ngú 'ngbé anokomia gba Ebhe-o! <sup>18</sup> Yi go zu mbilika ongbengbe ongámási ne ongámási gba osudha di ne osudha. Yi go zu mbilika opunda di ne mbilika osudha inde adhudhuku ne di-o. Yi go zu mbilika okpála, abana i du obhende bhú bali ne obhe bhú bali ade-o, abana i du odjedjedje ne ongbengbengbe.»

<sup>19</sup> Abhomu-o, ma au enu inde i de akoto bhú 'ngbé 'ngu-o, ne ongbengbe ongámási na doto, bhú dabili bini ne osudha gba o me u nde apo bhúla o ngú naha 'gú pi kpála inde adu pí punda ne osudha gba e-o. <sup>20</sup> Abhomu-o, kpála inde adu me ani nde a'u pí punda aholo enu-o bhú dabili bini ne polofeta na eu inde adu nani amene ongamba 'ngú li djila ani-o. Ani adu nani amene ongamba 'ngú bhomu-o ngú nato okpála inde u aye nani tele gba ani-e li kute o bhú ngita, inde adu di adhogø kulu ani-o. Kpála bhomu-o abhike enu-o bhú dabili bini ne polofeta na eu-o bhú dé

---

† 19:15 19:15 Tsia bhú Ets. 2:9.

djua na baluti. Aní abhike uo bhúbhú me u nde mu de. <sup>21</sup> Aní atsia abhili osudha gba uo ne ngise inde adu akoto bhú 'bhø ani-o. Abhomu-o, ndu odhu hana azu mbilika uo. U atsia a'u'u ne di.

## 20

### *U agbite Satana ngú kalanga kətø bini*

<sup>1</sup> Pipita-a, ma au andjelu bini ayie abhúlá, aní atsia akø píla doto. A adu sakpa aní ne lifungula na tsu 'du-o. A adu di sakpa aní ne 'ngbé gbíndjili na ngbéngbé. <sup>2</sup> Aní ago aholò 'ngbé kpulu na didili-o. 'Ngbé kpulu ango-o, a ko Satana inde djabulu. Andjelu ango-o agbite aní ngubula kalanga kətø bini. <sup>3</sup> Aní abhike aní bhú tsu 'dú. Aní adho bhøbhø nganda aní, aní atsia aye balua pépé. Balua aní aye e adu me, ngubula kalanga kətø bini-e, aní ngbngi matá 'ndji okpála de. Pipita-a, u atsé mbo 'kpa li aní ngú nedhinga bedi.

<sup>4</sup> Pipita-a, ma au okiti na ngámá. Okpála inde adulu pépé-e, u aha pi uo angu nakodho 'ngú gba okpála. Ma au di bua okpála bhende u ava nani ngulu o ka u abhuka kuku lu 'ngú inde li Yesu ambamba ta e di ne 'li Ebhe lie-o. U dhøgø nani enu-o de. U dhøgø di kulu ani-e de. U ye di nani tele gba ani-e pidi uo, i du di-e li 'kpa uo de. U azuku matá, u atsia au ngámá bhú dabili bini ne Kilisito ngubula kalanga kətø bini. <sup>5</sup> A bhomu-o bhutsibhutsi na bini me Ebhe zuku okpála-o. Okpála bhe koko adjéke ngaiza me kalanga kətø bini-e le paká, li Ebhe tsia zúku uo. <sup>6</sup> A ko djali pi okpála inde azuku bhú ká okpála inde li Ebhe

azuku o kalanu bhomu-o. A ko okpala gba Ebhe, la di-e, nakpi na bhisi-e ne angu pi uo ade. U adu odimandø gba Ebhe di ne gba Kilisito. U au ngama bhu dabili bini ne ani ngubula kalanga ketø bini.

### *Satana ati*

<sup>7</sup> Li kalanga ketø bini-e de ale-e, u gbé Satana bhu tikpu gba e-o. <sup>8</sup> Ani tsia nu napite opiga inde agbolo pila doto libhomu. A akunda napa me nayie bhu Gogo nakolo bhu Magogo.\* Ani apo bhula uo ngubula gbele. U tsia du bhelé nane sike lingo 'ngbé 'ngu mane. <sup>9</sup> U abha doto libhomu, u atsia asa bili li omaha Ebhe apo bhula o lie-o. U atsia asa di gudhu gba okpala li Ebhe akunda o-o. Engu bini, djua ayie abhula, atsia ago atsulu uo hana. <sup>10</sup> Abhomu-o, Ebhe atsia atumba djabulu, kpala inde adu nako napite uo, bhu de djua na baluti nganda enu-o bhu dabili bini ne polofeta na eu-o. U adu nazu likabhu oo ngbikpi ne sukpe duduama ne duduama.

### *Lele maka li Ebhe akodho 'ngu na soso-o lie-o*

<sup>11</sup> Pipita-a, ma au 'ngbé kiti na ngama bini me kpala bini nde adu pepe. Kiti ango-o adu bubu. Koki ne doto akpekpe de ani tsutsu. Kpala tsia u mata uo de. <sup>12</sup> Abhomu-o, ma au okpala inde amu-o, ongbengbengbe ne odjedjedje, alulu kala kiti na ngama-o. U abhulu obhuku. U atsia abhulu di bhuku koko, a adu bhuku na makobho-o. Abhomu-o, Ebhe atsia akodho 'ngu

---

\* **20:8** 20:8 Gogo ne Magogo: A ko 'ili ngu nasuno obhulu yala gba omatsalaele.

gba okpála inde amu-o nakpata lele kulu gba uo-o, nakpata engú inde u aye e bhú obhuku-o. <sup>13</sup> 'Ngbé 'ngu azie okpála inde amu inde adu bhúbhú-o. Kuo ne kuti gba okpála inde amu-o azie di okpála inde adu agba uo-o. Abhomu-o, Ebhe atsia akodho 'ngú gba kpála ne kpála nakpata lele kulu gba e-o. <sup>14</sup> Abhomu-o, Ebhe atsia atumba kuo bhú dabili bini ne kuti gba okpála inde amu-o bhú dé djua-o. Dé djua bhomu-o, a ko nakpi na bhisí. <sup>15</sup> Abhomu-o, ndu kpála hana inde u ye 'li e bhú bhuku na mukobho-o de-e, u abhike ani bhú dé djua bhomu-o.

## 21

### *Ebhe abhó ndu 'he hana ne toto*

<sup>1</sup> Pipita-a, ma au kokpí na mbia ne doto na mbia, anga kokpí na kalanu ne doto na kalanu-o andjia. 'Ngbé 'ngu du matá di-i de. <sup>2</sup> Ma atsia au gudhu na bubu-o ngayie abhúlá. Gudhu angoo, a ko Yelusalema na mbia. Ebhe atima gudhu angoo ngae. A adu akø kuto me a nde bedhe maka ølø inde aleke lie ngú nanu nakø lie ne 'ko e. <sup>3</sup> Ma adje kpála bini ngatobhila kpekpeke li pápá li kiti na ngámá-a adu li e me: «Mbia inde-e dabili nadu gba Ebhe-e bhú ká okpála. Ani adú ne uo, u tsia dú omaha ani. Ebhe ngae makpe adú bhú dabili bini ne uo, ani adú Ebhe gba uo. <sup>4</sup> Ani akúo ndu ngula sa kula uo hana, okpála mú matá-a de. Engú na da kuo dú matá-a de, egbá dú di-i de, likabhu dú di-i de, anga doto na kalanu-o nde andjia.»

<sup>5</sup> Abhomu-o, kpála inde adu pí kiti na ngámá-a atsia apa me: «Mbia inde-e, ma ngabho ndu 'he hana na mbia.» Pipita-a, ani apa muma me: «Ye 'ngú inde, anga eli ma ngapa e-e, a ko kukulu 'ngú, inde a ayo la di me okpála bhuka e ko.» <sup>6</sup> Ani atsia apa matá muma me: «A amene lie amene! Ngama-a, ma ne Alafa di ne Omega. Ngama-a, ma ne Kpála inde akpo lita ndu 'ngú hana, ma di ne Kpála inde abú ta ndu 'ngú hana. Kpála inde lie ne gumu 'ngu-o, ma ahá engu nandji mandji pi ani padhá bhú kpongu inde ngaha mukobho. <sup>7</sup> Kpála inde agbóko egú-o, ma ahá ndu 'he bhomu-o hana pi ani, ma adú ne Ebhe gba ani, ani tsia dú ndili gba ma. <sup>8</sup> La pi okpála bhende ngamene siti 'ngú-o, dá uo abhú dé djua na baluti na duduma ne duduma. A bhomu-o nakpi na bhisi. A ko okpála namene ngua siti 'ngú inde: obhulu tsulu, okpála ayala nabhuka , obhulu namene zabhe, obhulu nabhelo kpála, obambakuya, obhulu kelo, obhulu nayo oebhe na eu, ne obhulu eu.»

### *Yelusalema na mbia*

<sup>9</sup> Abhomu-o, suka oandjelu mananika inde adu sakpa o ne okópo mananika, inde abedhe ne olikabhu mananika na soso-o ago apa muma me: «Gogo, ma nu suno elo na kuva-a pi mu. A ko wala Ndili Kandelo-o .»

<sup>10</sup> Bu Bhobua ago abedhe ma, abhomu-o andjelu-o anu a'o ma pí 'ndjá 'ta. Eta ango-o adu ngbéngbé. Ani asuno gudhu na bubu-o muma. Gudhu ango-o, a ko Yelusalema li Ebhe atima e ngae-o. A ayie abhúla, a atsia adu aké kuto.

11 Zizi adu asu ka sangu gba Ebhe-o. Zi gudhu ango-o adu nasu ma ngingingi mugito me a ko teme\* na mase. 12 Aga inde u asa e li kukute-e adu ngbéngbé, di ndjándjá. Bhøbhø adu tété ndjikpa ne ka bhisi, oandjelu ndjikpa ne ka bhisi atsia adu nalilila. U atsia aye 'li opiga ndjikpa ne ka bhisi na Isalaele-e tété. 13 Ne ndu pasu hana bhøbhø adu tété bata: bata ne ndjongu, bata ne kati, bata li pápá na abebe, bata li pápá na yoyoko. 14 U ayiki aga bhomu-o pí oteme ndjikpa ne ka bhisi. U atsia aye 'li obhulu titima ndjikpa ne ka bhisi gba Ndili Kandølo-o tété.

15 Andjelu inde adu apa 'ngú mama-a, adu sakpa ani ne mbamba na olo inde ani adu napima ne e gudhu-o, ne obhøbhø, di ne aga ango-o. 16 Gudhu ango-o adu ne odjedje badha. A aviti bhú 'ndjá ne bhú bá, ne bhú 'ngbé-e bini. Li andjelu-o apima gudhu-o lie ne mbamba gba e-e, mbamba-a ali bhúbhú bhøtsibhøtsi køtø 12† ne ka bhisi ne ndu pasu hana. 17 Ani apima di aga-o, mbamba gba ani-e ali bhúbhú bhøtsibhøtsi køtø 144‡ bhú 'ndjá abhúla. Ani apima bha maka li okpála apipima 'he lie-o.

18 U ayiki nani aga ne teme inde u a'i e me djasepe. Gudhu-o libhømu adu ngili olo. A atsia adu ma ngilili maka tsupa na bubu. 19 Otème inde u amene 'dhu aga na gudhu-o ne e, u

---

\* **21:11** 21:11 Teme: Bhú eli na giliki-e, u aye me «Teme na djasepe ne kilisitale.» † **21:16** 21:16 Mbamba bhøtsibhøtsi køtø 12: Gudhu bhomu-o adu bhú 'ndjá-a masikpe de kilometele køtø bhisi ne 'he pépé ndu pasu hana. ‡ **21:17** 21:17 Mbamba bhøtsibhøtsi køtø 144: A ko masikpe de metele ndjikpa mananika ne ka bhisi.

aye nani tele tété ne ndu djua oteme na mase hana: bhe na bini-e adu teme na djasepe, bhe na bhisi-e adu teme na safile, bhe na bata-a adu teme na kalaseduane, bhe na badha-a adu teme na emelode, <sup>20</sup> bhe na bhuluvue adu teme na saladuane, bhe na madhia adu teme na kolonaline, bhe na mananika adu teme na kilidjolute, bhe na madjina adu teme na belile, bhe na odukpabini-e adu teme na topadje, bhe na ndjikpa-a adu teme na kilidjopaladje, bhe na ndjikpa ne ka bini-e adu teme na yasete, bhe na ndjikpa ne ka bhisi-e adu teme na ametisite. <sup>21</sup> Obhoti ndjikpa ne ka bhisi-e adu omayaka ndjikpa ne ka bhisi. U abho nani bhoti bini ne bini li li mayaka bini ma kpikili! 'Ngbé 'hi kpadji na gudhu-o adu nani ngili olo. A atsia adu ma ngilili maka tsupa na bubu.

<sup>22</sup> Ma u belegu 'ngbé 'ti Ebhe bhú gudhu bhomu-o de, anga Ebhe Ngamá Apí 'Kpí ngae makpe bhú dabili bini ne Ndili Kandele-o ne 'ngbé 'ti Ebhe ang-o ngao. <sup>23</sup> Gudhu ang-o du ne gumu ela abana di epe ngu naha zi kpí oo de, anga sangu gba Ebhe-e ngasu zi e oo ngae, Ndili Kandele-o la di ne tala ang-o ngae. <sup>24</sup> Opiga na doto adu adhuku li zi gudhu ang-o. Ongbengbe ongamási na doto tsia gó di ne tia gba o bhú gudhu ang-o. <sup>25</sup> Obhe bhoti na gudhu ang-o adu ndu nedhinga hana babá, u ní galikpe-e de, anga ekpí bí galikpe oo de. <sup>26</sup> Opiga na doto adu nali bhúbhú ne sangu di ne obabadha tia gba o-o. <sup>27</sup> Ehe bini na sisiti li oo de, abana okpála namene engu inde li Ebhe ayala e, abana obhulu

eu. A alí bha bini oo ne okpála inde u aye 'li o bhú bhuku na mukobho-o, bhuku gba Ndili Kandelø-o.

## 22

<sup>1</sup> Pipita-a, andjelu-o asuno muma ngade 'ngu inde ngaha mukobho pi okpála-o. Ngade 'ngu ango-o adu má ngilili maka tsupa na bubu. A adu ayie li bili li kiti na ngámá gba Ebhe ne Ndili Kandelø-o adu li e-o. <sup>2</sup> Engu ango-o atsia adu akpe li 'ngbé 'hi kpadji na gudhu na bubu-o. Ne ndu pasu bhisi na ngade 'ngu-o hana adu tété ne ndula inde ngaha mukobho. Ndula ango-o ngali lílí bhutsibhutsi ndjikpa ne ká bhisi bhú kalanga bini. A ngali lílí bhutsibhutsi bini ndu epe bini ne bini hana. Kpákpá-a atsia adu nateteke ngabula nakobho okuo gba opiga.

<sup>3</sup> Ohe inde li Ebhe tú matá pødjø li e, lí bhú gudhu ango-o de. Kiti na ngámá gba Ebhe ne uo ne Ndili Kandelø-o adú bhú gudhu-o. Obalise gba Ebhe-e tsia dú nadhøgø ani. <sup>4</sup> U aú bhúla ani, u tsia yé 'li ani pidi uo. <sup>5</sup> Sukpe dú matá-a de, u dú di matá ne gamu zi tala abana zi ela de, anga zi Ebhe Ngámá asú pi uo ngae, u tsia ú ngámá dudu ma ne dudu ma.

### *Nago ka Yesu*

<sup>6</sup> Pipita-a, andjelu-o apa muma me: «Ongú inde ma apa e, a ko kukulu 'ngú inde ayo me okpála bhuka e. Ebhe Ngámá inde ngato 'li e bhú opolofeta-a , atima andjelu gba e ngú nasuno pi

obalise gba e engú inde ayo me akolo mbia inde-o.»

<sup>7</sup> Yesu apa me: «Gbo 'dje mụ, Ma ngago mbia inde! A ko djali pi kpála inde ngalila ongú inde li Ebhe ambamba ta e bhú bhuku inde-o!»

<sup>8</sup> Ngama Djaa , ma adje ongú bhomu-o ne 'dje ma, ma atsia au di ne djila ma. Pita nadjedje ne nauu-o, ma ati bhú li 'dhu andjelu inde asuno ongú bhomu-o muma-a ngú nadhөгө ani. <sup>9</sup> Engú bini, ani apa muma me: «Mo oméne mo-o de! Ma ne bali gba Ebhe-e maka mụ. Ma bhadi maka ondaise mụ inde ngakpokpo kukulu 'ngú inde li Yesu ambamba ta e-o. Ma maka ndu okpála hana inde ngalila engú inde u aye e bhú bhuku inde. A ayo mangbo me mụ dhөгө Ebhe!»

<sup>10</sup> Pipita-a, andjelu-o apa muma me: «Mo owó ongú inde li Ebhe ambamba ta e bhú bhuku inde-e de, anga nedhinga ngú namene lie ka ongú ang-o akolo masikpe. <sup>11</sup> A ayo me kpála bhende ngamene siti 'ngú-o nu bha nedi ne kalanu, kpála bhende ngamene engú inde li Ebhe ayala e nu bhadi nedi ne kalanu. Kpála bhende ngamene ngbili 'ngú nu bhadi nedi ne kalanu, amba kpála bhende ngamene engú inde nganga li Ebhe-e nu bhadi ne di ne kalanu.» <sup>12</sup> Yesu apa me: «Gbo 'dje mụ, ma ngago mbia inde! Ma ngago sakpa ma ne makalá inde ayo me ma ha e pi kpála ne kpála nakpata lele kulu inde ani amene e-o. <sup>13</sup> Ngama-a, ma ne Alafa di ne Omega, a kunda napa me ma ne kpála na kalanu, ma la di ne kpála na soso. Ma ne Kpála inde akpo lita ndu

'ngú hana, ma di ne Kpála inde abú ta ndu 'ngú hana.»

<sup>14</sup> A ko djali pi okpála inde ngavulu obongo gba o-o. Ebhe Ngámá ahá kpadji pi uo me, u li li obhoti na gudhu na bubu-o, amba u zu di lí 'lá inde ngaha mukobho-o. <sup>15</sup> Engú bini, ndu okpála bhe koko hana, u lí bhú gudhu-o de. Okpála ango-o ngao inde: okpála inde li Ebhe atu pedje li o, obhulu kelo, obhulu zabhe, obhulu nabhili okpála, okpála inde ngadhogo oebhe na eu, di ne ndu okpála hana inde ngakpi ndjili li eu, inde di ngapa eu-o.

<sup>16</sup> «Ngama Yesu-o, ma atima andjelu gba ma-a ngú nago nambamba ta ongu bhomu-o pi yi bhú oDadjua gba Ebhe-o. U azu ma bhú piga gba 'ngbé ngámá Davidi. Ma ne ikupala inde asusu kekpi-o.»

<sup>17</sup> Bu Bhobua ngauo ne elo na kuva apa me: «Gogo!»

A ayo me kpála inde adje engú inde-e pa di me: «Gogo!»

A ayo me kpála inde li e ne gumu 'ngu-o gogo.

A ayo me kpála inde li e ne gumu engu inde ngaha mukobho-o sia padhá.

### *Engú na soso*

<sup>18</sup> Ngama Djaa, ma ngagbele 'dje ndu okpála hana inde ngadje ongu inde li Ebhe ambamba ta e bhú bhuku inde-e me, li kpála bini 'o engú koko pépé-e, Ebhe 'ó bhadi ndu olikabhu hana inde u aye e bhú bhuku inde-e pí ani! <sup>19</sup> Li kpála bini 'e la di ehe bini bhú ká ongu inde li Ebhe ambamba ta e bhú bhuku inde-e, Ebhe 'é makalá

gba ani inde u akpokpo 'ngú e bhú bhuku angoo. Makalá angoo, a ko lí 'lá inde ngaha mukobho pi okpála, a ko la di nali bhú gudhu na bubu-o.

<sup>20</sup> Kpála inde alu pí ndu 'ngú inde-e hana apa me a ko kukulu 'ngú-o apa me: «A moko, ma ngago mbia inde!»

Ngama Djaa, ma atsia apa me: «A adu moko! Gogo, Ngámá Yesu.»

<sup>21</sup> A ayo me Ngámá Yesu suno bádha bhú 'bu gba e pi ndu yi hana.

**Gandja na Mbia**  
**Mayogo: Gandja na Mbia (New Testament)**

copyright © 2020 Wycliffe Bible Translators, Inc.

Language: (Mayogo)

Contributor: Wycliffe Bible Translators, Inc.

All rights reserved.

2020-11-18

---

PDF generated using Haiola and XeLaTeX on 21 Feb 2024 from source  
files dated 29 Jan 2022

6b4904fb-f8ce-5931-8218-7cee8914232c